





Ex Bibliotheca  
majori Coll. Rom.  
Societ. Jesu

55.14.2.

I

707

55

8

2

55.

d

2.

14-25-A-10.

۲۰



INVESTIGATIO  
MOMENTORUM  
QUIBUS GRAVIA  
TENDUNT DEORSUM.

*Autore*  
JO. FRANCISCO VANNIO  
*E Societate JESU.*

Ad Illustriss. & Reverendiss. D.

D. JOANNEM  
CIAMPINUM

Brevium Gratia Magistrum, & in utraque  
Signaturâ Referendarium.



ROMÆ, Typis Dom. Ant. Herculis. 1693.+  
*Superiorum Facultate.*



3  
PRÆFATIO  
NUNCUPATORIA:



**M**OMENTA Graviorum,  
dignissima sunt, in quibus explicandis, felici-  
cium ingeniorum desudet industria. Nam,  
præterquamquod continent leges multorum impulsuum ac  
descensuum naturalium, qui assidue  
nobis ob oculos versantur, easque ab  
Eruditis passim ignorari non mediocre  
probrum est; Momentorum doctrinâ,  
veluti basi ac fundamento, nituntur  
tres præclaræ Scientiæ, videlicet Sta-  
tica, Mechanica, & ea quæ contem-  
platur motum æquabiliter accelera-  
tum, sine quibus, Mathematico esse  
nemini licet. Jam si veteres Autores  
consulantur, mirum videbitur, de Mo-

A 2                      men-



mentis Graviū siluisse omnes , præter Pappum Alexandrinum , Libro VIII. propos. 9. quam licet bonâ fide admiserit Guido Ubalduſ de Monte , in Mechan. propos. 2. de Cochleâ , eandem tamen deducit ad absurdum P. Nicolaus Cabeus Lib. IV. Philosophiæ Magneticæ cap. 20. Quum enim, ad impediendum descensum gravis per planum parvæ declivitatis , sufficiat potentia multò minor toto ipſo pondere ; ad elevationem verò ponderis per planum parvæ acclivitatis , requiratur potentia tantillo major eâ qua ſufficeret ad impediendum descensum ; Pappus ad impediendum descensum adhibet potentiam longè majorem toto pondere .

Ipsū quoque assumptum Pappi reprehenditur a Galileo in tractatu de scientiâ Mechanicâ . Quia pondus non facit ullam resistantiam ne moveatur per planum horizontale ; facit aliquam resistantiam ne elevetur per planum acclive ; maximam verò ac totalem resistant-



*sistentiam facit ne eleuetur perpendiculariter. Itaq; indagare oportet proportionem, non inter primam resistantiam, quæ nulla est, & secundam, ut facit Pappus; sed inter secundam resistantiam ac tertiam.*

*Hanc proportionem, eodem ferè tempore, superiori seculo, Hieronymus Cardanus Libro de Proportionibus propos. 72. metitus fuit angulis, quos tum plana declivia tum planum verticale faciunt cum plano horizontali. Ex opposito, longitudinibus tum perpendicularorum demissorum ex planis declivibus, tum planorum ipsorum metiri eam voluit Nicolaus Tartalea, Libro VIII. Quæstionum & Inventionum diversarum propos. 15. cui adhasere, Simon Stevinus Libro I. Staticæ propos. 19. cum aliis multis, ac præcipuè Galileus Dialogo III. de Motu & Machinis: ejus tamen fundamenta, utcumque novis ratiociniis in posthumâ editione Dialogorum fulta, non satis*

firma visa sunt Alexandro Marchetto in Fundamentis universæ scientiæ de motu uniformiter accelerato . Mihi ex adverso jam dudum persuasum est , fundamenta Galilei solida esse ac synccera . Ex iis tamen deduci , momenta gravium descendantium non esse nisi ut angulos . Ipsa fundamenta breviter inspiciamus .

Docet Galileus Dial. II. vectem primi generis, qui sustineat duo pondera inæqualia & reciproca distantiarum a potentiâ ipsum vectem sustinente manere in æquilibrio, quia mediætas aggregati duorum ponderum inæqualium est ad dexteram perpendiculi potentiæ, mediætas ad sinistram . Ad stabiliendum verò istud principium , quo continetur clavis problematis celeberrimi de æquilibrio vectis , fortasse ad hanc diem insoluti , adhibuimus duo theorematâ geometrica, quæ universaliorē redderent doctrinam Archimedis prepos. 6. & 7. Libri I. Æquiponder.

Docet

*Docet præterea Galileus Dial. III. Momenta globi descendantis super plano declivi, æquari gravitati quam sustinet potentia impediens descensum globi. Eandemque potentiam applicat diametro globi parallela ad planum declivæ, quæ diameter à Merssenno in Phenomenis Mechanicis propos. 12. ex Galileo vocatur linea directionis.*

*Hæc duo principia Galilei esse vera, ex iisque inferri, momenta esse ut angulos, contra quàm ipse censuit, non persunctoriè ostendere conatur meus hic Liber, qui in Tuo nomine apparere gestit, JOANNES CIAMPINE Prasul Illustrissime. Gratulantur sibi liberales Facultates, quòd tam splendidum domicilium obtinuerint, non modò in Tuo Museo ac Bibliothecâ, & in singulis conclavibus ædium Tuarum, quæ jam pretiosa erudita Antiquitatis cimelia, & lectissimos libros non capiunt; sed quod præcipuum & rarissimum est,*

*in mente Tuâ . Quum autem ab incun-  
te etate veterum Scriptorum monu-  
menta sedulò evolviſſes , ad Encyclopa-  
dia curſum abſolvendum , recentium  
quoque Autorum doctrinam in Te de-  
rivare non es cunctatus . Atque ut eam  
minimo auri ac temporis impendio ſal-  
tem delibare unusquiſque poſſet ; Ephe-  
merides Literatorum Romæ primus om-  
nium , plurium annorum ſpatio publici  
juris feciſti . Mox Præſulis dignitate,  
ac pluribus muneribus auctus , Acade-  
miam apud Collegium Urbanum de  
Propagandâ Fide , in qua de rebus Ec-  
cleſiaſticis accuratiſſimè diſſeritur ; al-  
teramque in ædibus Tuis, quæ Phyſico-  
mathematica nuncupatur , condidiſti .  
Ac licet negotiis plurimis aſſiduè diſti-  
nearis, ab Eruditiffimis Libris conſcri-  
bendis edendisque , nunquam ceſſas ;  
quaſi animi levamentum ac ſolacium ,  
extra bonas Literas non invenires .*

*Quantum ceteræ Facultates Liberali-  
tati ac Sapientiæ Tuæ debeant, per ſuos  
cul-*

*cultores disertè singula prædicabunt :  
 Ego certè , ne merita in me Tua , obli-  
 vione deleri sinam , libens fateor ac præ-  
 mefero : ex quo in Academia Physico-  
 mathematica , novæ Momentorum Phi-  
 losophiæ audientiam fecisti , vitali au-  
 ra & spiritu ipsam frui cæpisse .*

FRAN-

10  
FRANCISCUS GUARINUS  
SOCIETATIS JESU,

In Provinciâ Romanâ Præpositus  
Provincialis.

**C**UM librum cui titulus *Investigatio Momentorum quibus gravia tendunt deorsum.* a P. Jo. Francisco Vannio, nostræ Societatis Sacerdote conscriptum, aliquot ejusdem Soc. Theologi recognoverint, & in lucem edi posse probaverint; potestate nobis à P. Thyrso Gonzalez Præposito Generali ad id traditâ facultatem concedimus ut typis mandetur, si ita iis ad quos pertinet videbitur. Cujus rei gratia has literas manu nostra subscriptas, sigilloque nostro munitas dedimus. Romæ 15. Decembris 1692.  
*Franciscus Guarinus.*

Imprimatur & videbitur Reverendis. P. Mag. Sac. Pal. Apost. Sperellus Episc. Interamnen. Vicesg.

**J**UBENTE Reverendis. P. Fr. Thoma Maria Ferrari Sac. Pal. Apost. Mag. perlegi librum cui titulus *Investigatio Momentorum quibus gravia tendunt deorsum.* Autore Adm. Rev. P. Jo. Francisco Vannio S. J. & in eo nihil reperi Fidei Catholicæ dogmatibus contrarium: in quorum fidem hæc scribebam pridie eidus Aprileis 1693.  
*Ego Franciscus Blanchinus S. M. ad Martyres Can.*

Imprimatur. Fr. Franciscus Maria Forlani Reverendis. P. Fr. Thomæ Mariæ Ferrari Sac. Apost. Pal. Mag. Soc. Ord. Prædicatorum.  
I N-

# INVESTIGATIO MOMENTORUM QUIBUS GRAVIA TENDUNT DEORSUM. --- SUPPOSITIONES.

1. **G**RAVIA quæ consideramus, habent plerumque figuram globorum, ac semper habent summam partium, coherentiam, uniformitatem & soliditatem, cum summo lavore in totâ superficie. Similiter plana quæ tanguntur a globis, habent summam firmitatem & soliditatem, cum summo lavore in totâ superficie. Si autem globi aliave pondera sustineantur per fila, concipimus fila veluti lineas mathematicas, quæ habeant summam coherentiam suarum partium, & de se careant gravitate. Si globi aut aliâ pondera pendeant per fila ex lineis rigidis rectis vel curvis, consideramus tales lineas rigidas esse de se expertes gravitatis, & omnino infrangibiles & inflexibiles.

2. Descensus gravium quos consideramus sunt per lineas rectas & sunt liberi, seu non habent ullum impedimentum, quo retardetur velocitas debita gravitati quæ causat singulos descensus.

3. Ve-

3. Velocitas globi liberè descendens super plano declivi est minor velocitate quàm idem globus liberè descenderet perpendiculariter. Ac pressio quam sustinet planum declive a globo super se descendente, est minor pressione quam ab eodem globo quiescente sustineret planum horizontale. Si augeatur declivitas plani, augetur velocitas globi, ac minuitur pressio quam sustinet in ipso descensu planum declive. Si minuatur declivitas plani, minuitur velocitas globi, & augetur pressio quam sustinet in descensu planum declive.

4. Globus liberè descendens perpendiculariter, exercet impulsus ac momentum solius descensus perpendicularis. Globus quiescens super plano horizontali exercet momentum solius pressionis quam sustinet ipsum planum horizontale. Globus verò descendens super plano declivi exercet duo momenta, unum descensus, alterum pressionis quam sustinet in descensu ipsum planum.

5. Consideramus potentias quæ sustinent gravitatem globorum, applicari globis, filis aut lineis rigidis per meros contactus indivisibiles.

6. Arcus paralleli horizonti, seu arcus ex centro Mundi, ad sensum sunt lineæ rectæ. Ac perpendicularia omnia uniuntur in centro Mundi, licet sint invicem ad sensum parallela.

## DEFINITIONES.

1. **A**ngulus inclinationis plani declivis est, quem planum declive facit cum plano verticali. Angulus inclinationis plani horizontalis



alis est quem planum horizontale facit cum plano verticali .

2. Angulus elevationis plani declivis est quem planum declive facit cum plano horizontali . Angulus elevationis plani verticalis est quem planum verticalis facit cum plano horizontali .

3. Perpendicularum globi aut cuiusvis ponderis est linea recta imaginaria , transiens per centrum gravitatis globi , & perveniens ad centrum Mundi . Perpendicularum potentiae est recta imaginaria transiens per punctum applicationis potentiae , ac perveniens ad centrum Mundi . *Omnia haec perpendiculara sunt ad sensum invicem parallela per suppos. 6.*

4. Momentum totale globi descendens est impetus quo globus liberè descendit perpendiculariter . Momentum globi descendens super plano declivi , est impetus , quo globus incumbens plano declivi , liberè descendit super eodem plano . *Hoc momentum vocari potest parziale, quatenus est minus momento totali , quo idem globus exigit descendere perpendiculariter .*

5. Linea directionis est linea recta , quam in descensu naturali describit centrum gravitatis globi , adeoque respectu descensus perpendicularis , linea directionis in globo est diameter normalis horizonti ; nam haec incidit in perpendicularum globi . Si descensus globi super plano declivi sit naturalis , linea directionis est diameter globi parallela plano declivi .

6. Vectis primi generis est linea rigida horizonti parallela , per quam una potentia existens inter duo pondera , sustinet eadem pondera .

12. Vectis secundi generi est linea rigida hori-  
zonti parallela, per quam unum pondus exi-  
stens inter duas potentias, ab eis sustinetur.

## A X I O M A T A.

1. **I**mpulsus æqualis illi quem efficit gravitas determinata, non differt staticè ab illâ eâ-  
dem gravitate. Ac proinde, ubi exercetur im-  
pulsus æqualis illi quem exercet gravitas deter-  
minata, ibi existit gravitas æqualis illi impul-  
sui ac momento. Ubi autem non exercetur ul-  
lus impulsus proprius gravitatis, qui dici solet  
gravitatio, ibi non existit staticè ulla gra-  
vitas.

2. Si in quadrante ABC, radius AB sit  
planum horizontale, radius CB sit  
planum verticale, radius DB sit pla-  
num declive: planum DB respectu  
plani horizontalis AB est elevatum,  
respectu plani verticalis CB est in-  
clinatum.



Quia cum plano AB facit angulum  
elevationis DBA, cum plano CB facit angulum  
inclinationis DBC. Unus verò angulus est re-  
ciprocus alterius, & est ejus complementum,  
ad angulum rectum ABC.

3. Partialis elevatio plani DB ad totalem  
elevationem plani CB, est ut angulus elevatio-  
nis acutus DBA ad angulum elevationis re-  
ctum CBA. Partialis inclinatio plani DB, ad  
totalem inclinationem plani AB, est ut angu-  
lus inclinationis DBC acutus, ad angulum in-  
clinationis ABC rectum. Nec possunt eleva-  
tiones aut inclinationes planorum declivium,  
dici

dici partiales , nisi considerando angulos elevationis aut inclinationis acutos , relativè ad angulum elevationis aut inclinationis rectum .

4. Planum DB quod congruat cum plano verticali CB , non facit cum eo ullum angulum inclinationis; cum plano autem AB facit maximum angulum elevationis qui est rectus . Planum DB quod congruat cum plano horizontali AB, non facit cum eo ullum angulum elevationis , & facit cum plano CB maximum angulum inclinationis qui est rectus .

5. Si à puncto D fiat recta DE normalis ad AB, adeoque parallela ad CB; angulus EDB alternus anguli inclinationis DBC, & illi æqualis ex 29. I. Elem. potest accipi ut angulus inclinationis plani declivis DB. *De triangulo DEB videatur Scholion propositionis 17.*


6. Recta insistsens normaliter alicui plano , facit cum eo in gyrum angulos rectos . Itaque partes talis rectæ non habent a puncto contactus ullam distantiam quoad latitudinem , sed solum quoad longitudinem .



# LEMMATA GEOMETRICA

## LEMMA I.

**I**N circulis concentricis AC, DF, arcus AB, DE, quos intercipiunt radii AG, BG, sunt similes.



Radius CG fit normalis radio AG; arcus AB ad arcum AC, est ut angulus AGB ad rectum, AGC ex 33. VI. & similiter arcus DE ad arcum DF, Ergo arcus AB ad arcum AC, est ut arcus DE ad arcum DF. Dividendo autem & permutando, arcus AB ad arcum DE, est ut arcus BC ad EF. Adeoque arcus AB, DE sunt similes, idemque dic de arcibus BC, EF.

## Corollarium I.

**S**ectores AGB, DGE sunt similes, ut etiam sectores BGC, EGF. Ergo sectores AGB, BGC, sunt ut sectores DGE, EGF; & ut sectores illi, ita sunt segmenta ABED, BEFC. Porro proportionem inter distantias trium radiorum AG, BG, CG, metiuntur anguli AGB, BGC, AGC; & arcus AB, BC, AC, ex 26. III. Elem.

## Corollarium II.

**S**I fiant rectæ BL, EI, normales ad AG; triangula rectangula BLG, EIG, utpotè similia, sunt ut sectores BGA, EGD. Sed in triangulis BLG, EIG, rectæ BL, EI, sunt ut hypotenusæ BG, EG, ex 2. VI. Ergo in sectoribus BGA, EGD,

*Quibus gravia tendunt deorsum . 17*

EGD, arcus BA, ED, sunt ut radii BG, EG. Adeoque, si arcus oppositi NO, ED sint ejusdem circuli, arcus oppositi BA, NO, sunt ut radii BG, NG. Ac præterea ipsi arcus BA, NO sunt similes.

L E M M A I I.

**I**N circulo ABD, cujus radii sint AB, AC, AD; arcus BD ad arcum BC, & angulus BAD ad angulum BAC, majorem habet rationem, quàm habeat sinus rectus DG ad sinum rectum CF.



Prolongetur in E radius AB, & per puncta D & C fiat recta DE quæ erit hypotenusa triangulorum EGD, EFC, rectangulorum & similium; eritque simul basis triangulorum ADE, ACE, habentium eandem altitudinem. Rectæ ED, EC ex 2. VI, sunt ut rectæ DG, CF; & ex 1. VI, sunt ut triangula ADE, ACE. Dividendo autem ex 17. V, rectæ DC, CE, sunt ut triangula ADC, ACE. Similiter ex 26. III, arcus BD, BC, sunt ut anguli BAD, BAC, & ut sectores BAD, BAC; ac dividendo ex 17. V, arcus BC, CD sunt ut anguli BAC, CAD, & ut sectores BAC, CAD. Jam sector CAD est major triangulo ADC; triangulum verò ACE majus est sectore BAC. Ergo ex 8. V, sector CAD majorem habet rationem ad sectorem BAC quàm ad triangulum ACE; & ad ipsum triangulum ACE, majorem habet rationem sector CAD quàm triangulum ADC. Ergo componendo ex 18. V, majorem habet rationem arcus BD ad arcum BC, & angulus BAD ad angulum

B

gulum

gulum BAC, quam recta ED ad rectam EC, videlicet ex 2. VI, quam sinus rectus DG ad sinum rectum CF. Theorema hoc apud Regiomontanum in Epitome Almagesti est 7. propos. Libri I.

## LEMMA III.

**S**I radius BC dividat semicirculum ABD in duos quadrantes, adeoque sit normalis diametro AD; radii verò RC, SC sint invicem normales: anguli SCB, RCA ex normalibus sunt æquales; & similiter anguli RCB, SCD.



Angulus BCA est rectus, & similiter angulus SCR. Ergo sublato angulo communi BCR, anguli SCB, RCA sunt æquales. Eodem modo sunt æquales anguli RCB, SCD. Porro si diameter AD sit parallela horizonti, & radii RC, SC sint plana declivia; angulus elevationis unius plani est æqualis angulo inclinationis alterius plani, & est reciprocus tum anguli inclinationis sui plani, tum anguli elevationis alterius plani.

## Corollarium I.


**S**I rectæ RN, SO parallelæ ad BC, compleant triacula rectangula RNC, COS, angulus CRN est alternus & æqualis angulo RCB, & angulus CSO angulo SCB. Ergo anguli CSO, RCN sunt æquales; anguli NRC OCS sunt æquales, adeoque ob hypotenuas RC, SC æquales, triacula RNC, COS, sunt æqualia, ex 26. I. & in iis latera SO, CN sunt æqualia; & similiter latera RN, CO.

Si radios RC, SC tangat semicirculus TEV radiis FL, GL, diametri verò TV, AD, sint pa-

parallelæ, radius EL sit normalis diametro TV, ac rectæ FM, GH sint normales radio EL; radius LF normalis ad LG & RC est parallelus ad SC; radius LG normalis ad LF & SC est parallelus ad RC. Ac præterea triangula rectangula FML, LHG sunt invicem æqualia, & singula ex 4. VI, sunt similia triangulis RNC, COS. Itaque ut hypotenusa RC ad FL, sic latus RN ad FM. ut hypotenusa SC ad LG, sic latus SO ad GH.

Corollarium II.

**S**I in semicirculo ABD, radii RC, IC non sint normales, radius verò BC, & rectæ RN, IP sint normales diametro AD: angulus CIP est alternus & æqualis angulo ICB. Sed angulus BCA est rectus, secus verò angulus ICR. Ergo sublato angulo communi RCB, anguli ICB, RCA non sunt æquales. Itaque triangula rectangula RNC, CPI non sunt æqualia nec similia.



Si eisdem radiis RC, IC, tangat semicirculus TEV radiis FL, GL (qui neque ipsi sunt normales) diametro verò TV, AD sint parallelæ; radius EL sit normalis diametro TV, ac rectæ FK, GH sint normales radio EL; radius LF non est parallelus ad IC, neque LG ad RC. Anguli FLE, GLE simul, sūt æquales angulis RCA, ICD simul. Anguli RCB, ICB simul, sunt æquales angulis FLT, GLV simul. Adeoq; si angulus RCI, & angulus ei æqualis, conflatus ex duobus FLT, GLV sit obtusus, angulus conflatus ex duobus RCA, ICD, & angulus ei æqualis FLG est

acutus & viceversâ: Triangula FKL, RNC sunt similia, ut etiam triangula LHG, CPI; ac triangula FKL, LHG sunt inter se ut triangula RNC, CPI. Sinus recti FK, GH, sunt ut sinus recti RN, IP.

## LEMMA IV.



**S**I planum LCAB quod sit vel sector circuli, vel semicirculus, vel residuum sectoris, a radio DA dividatur cogitatione in duas partes inæquales BAD, CAD; in medio autem plani LCAB sit radius LA, in medio partium BAD, CAD sint radii HA, IA: partes BAD, CAD sunt reciproce arcuum HL, IL; & angulorum HAL, IAL.



Plana BAD, CAD ex 26. III, sunt ut arcus BD, CD, adeoque sunt ut arcus HD, ID eorum dimidii. Sed arcus LC dimidius arcus BC æquatur arcui HI, qui constat ex arcubus HD, ID, dimidiis arcuum BD, CD. Ergo sublato arcu



communi LI, arcus CI, HL sunt æquales. Quia verò arcus ID, CI, sunt æquales, etiam arcus HL, ID sunt æquales: iisque addito arcu LD, arcus HD, IL sunt æquales. Ergo arcus HD, ID, seu plana BAD, CAD, sunt reciproca arcuum HL, IL; & angulorum HAL, IAL.

*Corollarium I.*

**P**artes BAD, CAD, nequeunt esse reciproce arcuum HL, IL, & angulorum HAL, IAL, quia centrum commune habeant in radio LA



LA qui residet inter medietates CAL, BAL  
plani LCAB. Ergo radius LA residet necessa-  
rio inter medietates CAL, BAL, si partes  
BAD, CAD sint reciprocae arcuum HL, IL,  
& angulorum HAL, IAL.

*Corollarium II.*

**S**I planum LCAB sit semicirculus, angulus  
HAI est rectus; nam constat medietatibus  
duorum angulorum BAD, CAD, qui simul  
sumpti æquantur duobus rectis. Itaque si pla-  
num LCAB sit sector circuli, angulus HAI est  
æcurus. Si sit residuum sectoris, angulus HAI  
est obtusus.

*Scholion.*

**S**I in sectore LCAB, ex centro A fiat arcus  
RS, & uterque arcus sit parallelus horizon-  
ti, adeoque punctum A sit  
centrum Mundi; segmentum  
CBSR habet ad sensum fi-  
guram rectanguli de quo  
agemus lemmate 5. Proin-  
de in rectangulo apparenti



CBSR, distantias rectarum HQ, IP a rectâ LN,  
metiuntur lineæ HL, IL, & QN, PN, quæ ad sen-  
sum sunt rectæ, revera tamen sunt arcus circulo-  
rum Mundo concentricorum. Similiter tres re-  
ctæ HQ, LN, IP, quæ sunt parallelæ ad sensum, si  
prolongentur faciunt angulos in centro Mundi

LEMMA V.

**S**I rectangulum CS dividatur cogitatione  
duo rectangula inæqualia DS, CT; ac re-  
cta LA sit in medio plani CS, rectæ verò HQ,  
IP sint in medio planorum DS, CT: plana  
DS, CT sunt reciproca rectarum HL, IL,

B 3

R:



Rectangula DS, CT sunt ut rectæ BD, CD, ex 1. VI. adeoque sunt ut rectæ HD, ID, earum dimidia. Sed recta LC, totius BC dimidia, æquatur rectæ HI, quæ constat ex HD, ID, dimidiis partium BD, CD. Ergo sublatâ communi LI, rectæ CI, HL sunt æquales. Quia verò rectæ ID, CI sunt æquales, etiam HL, ID sunt æquales: iisque additâ LD, rectæ HD, IL sunt æquales. Ergo rectæ HD, ID, seu plana rectangula DS, CT sunt reciproca rectorum HL, IL. Hoc theoremate nititur propositio 6. Libri I. Æquiponderantium Archimedis.



*Corollarium.*

**P**artes DS, CT nequeunt esse reciproca rectorum HL, IL, quin centrum commune habeant in rectâ LA, quæ residet inter medietates CA, LS. Ergo recta LA residet necessariò inter medietates CA, LS, si partes DS, CT sint reciproca rectorum HL, IL.

*Scholion.*

**S**I lineæ CB, RS sint arcus ex centro Mundi, & rectæ CR, BS sint normales horizonti, ad sensum constituunt rectangulum CS ut supra observavimus. Porro in rectangulis geometricis, proportionem inter distantias HL, IL ac similes, metiuntur lineæ rectæ; in planis ad sensum rectangulis, metiuntur arcus ex centro Mundi, & anguli in eodem centro; in planis circularibus, metiuntur arcus ex eorum centro, & anguli in centro. Eodem modo in solidis parallelepipedis, proportionem inter distantias metiuntur lineæ rectæ; in solidis quæ sint ad sen-

sensum parallelepipedā, sed revera sint portiones sphaeræ Mundo concentricæ, metiuntur arcus ex centro Mundi & anguli in ipso centro; in globis metiuntur arcus ex eorum centro & anguli in centro.

LEMMA VI.



**S**I rectangulum AC dividatur in duo rectangula AF, EC, ac fiat diameter AC; proportionem inter distantias rectarum parallelarum AB, EF, DC, perinde metitur recta AC vel recta BC aut AD.

Triangula rectangula ABC, GFC sunt similia ex hypothesi. Ergo ex 2. VI, recta AG ad GC, est ut BF ad FC, ut AE ad ED; & ut AC ad GC, ita BC ad FC, AD ad ED. Adeoque ut AG ad CG, ita AE ad CF. Ergo &c. Ex opposito. Si planum AC sit rectangulum solum ad sensum ut supra dicebamus; diameter verò AC sit linea recta: tum DE, AE, tum CF, BF non sunt sinus recti de quibus lemmate 2, sed sunt arcus ex centro Mundi. Atqui DE, AE, ac CF, BF nequeunt esse ut rectæ CG, AG, nisi sint sinus recti. Ergo non sunt ut rectæ CG, AG.

*Corollarium I.*

**I**N triangulo rectangulo ABC, latera AB, BC ad hypotenusam AC, non sunt ut anguli ACB, CAB ad angulum rectum ABC. Nam latera AB, BC simul, sunt majora hypotenusâ AC ex 20. I. anguli verò ACB, CAB simul, sunt æquales angulo recto ABC ex 32. I.

*Corollarium II.*

**S**I ob quadrantem ADCB inscriptum quadrato IEFH, triangula rectangula DEC, CFB,

B 4

EHA



BHA, AID sint æqualia inter se ; sumptaque EG æquali ad IA fiat recta AG, puncta verò D & B jungantur rectâ DB : rectæ DO, BO ex hoc lemmate, sunt ut rectæ EG, FG. Adeoque sunt ut DE, BF. Anguli verò BCF, BAG sunt æquales ex lemmate 3, & similiter anguli DAG, DCE.

## DE MOMENTIS GRAVIUM.

### PROPOSITIO I.



**S**I filum LD normale horizonti sustineat globum in D, ac sustineatur ab unâ potentiâ in L : tota gravitas globi & sustinetur, & existit staticè in totâ lineâ LD & in singulis ejus partibus.

Supponimus, partem DE fili LD esse diametrum globi, & hujus gravitatem esse trilibrem. Totum filum LD, & unaquæque illius pars, respectu globi est potentia, exercens virtutem, sustentativam parem gravitati trilibri ; respectu potentiae L est pondus exercens momentum, pressionis trilibre. Ergo posito quòd filum LD sustineat globum in D ac sustineatur in L, tota gravitas trilibris & sustinetur ut est manifestum; & per axioma 1, existit staticè in totâ lineâ LD, & in singulis ejus partibus.

*Corollarium.*

**S**ustentatio per quam potentia L detinet globum immotum, affert globo impedimentum totale ne descendat ; impedimentum  
autem

autem totale reddit impossibilem descensum. Ergo in sensu composito sustentationis, descensus globi est impossibilis. Quia verò globus impeditus ne descendat, determinatur à suâ gravitate ut exercent omnem conatum quem potest, ad tollendum tale impedimentum: evidens est illum conatum esse necessarium globo quoties impeditur ne descendat. Si talis conatus est necessarius globo, ac descensus ipse est impossibilis, pressio quam sustinet potentia impediens descensum, ordinatur immediatè ad tollendum impedimentum descensûs, non verò ad descendendum; alioquin ordinaretur immediatè ad id quod est impossibile immediatè. Ergo si globus detineatur immotus a potentiâ, pressio quam efficit gravitas globi, ordinatur immediatè ad tollendum impedimentum descensûs, non verò ad descendendum. Nihil autem prohibet, eidem puncto L applicari duas potentias, itaut ex totâ gravitate existènte in perpendiculo LD, una potentia sustineat unam partem, alia aliam.

*Scholion.*

**G**lobus qui liberè pendeat ex filo LE in E, non differt staticè a globo, qui liberè pendeat ex filo LD in D. Nam uterque habet centrum gravitatis in perpendiculo LD. Similiter aggregatum plurium gravium quod liberè pendeat ex filo LE in E, habet centrum commune gravitatis in perpendiculo LD. Itaque sustentatio & gravitatio in perpendiculo LD & in singulis partibus, æquè habent locum in globo, & in aggregato plurium gravium. Porro perpendiculum in quo existat staticè tota gravitas molis cujuscunque figuræ, ne cessariò refi-

det

det inter medietates ejusdem molis, & occupat medium gravitatis naturalis ut est manifestum.

## PROPOSITIO II.

**S**I scaphium sustineat globum, & sustineatur a plano horizontali; tota gravitas globi respectu scaphii existit staticè in solo aggregato diametrorum, quæ incumbunt scaphio; respectu plani horizontalis existit staticè in solâ diametro, quæ incumbit plano.

Consideramus scaphium veluti superficiem rigidam concavam, coaptatam globo, & de se expertem gravitatis. Ex hypothese globus sustinetur a scaphio, & per scaphium sustinetur a plano horizontali: Ergo ex i. suppositione, tota gravitas globi respectu scaphii &c.

## Corollarium.

**I**Taque momentum quo globus premit planum horizontale in unicâ diametro, æquatur aggregato momentorum, quibus idem globus premit scaphium in aggregato diametrorum; ac momenta ista globi non sunt absoluta sed solum respectiva. Nam relatè ad sustentationem in extremo solius diametri normalis horizonti, exercetur momentum in solâ illâ diametro; relatè ad sustentationem in aggregato diametrorum incumbentium scaphio, exercetur momentum in solo illo aggregato.

## PROPOSITIO III.



**S**I globus liberè descendat perpendiculariter; tota ejus gravitas existit staticè in lineâ directionis ED, per quam impellit deorsum centrum globi.

Si globus sit liber ut descendat perpendiculariter.

pendiculariter, tota gravitas impellit centrum globi ut tendat ad centrum gravium per viam brevissimam, qualis est linea directionis, incidens in perpendicularum ipsius globi. Ergo momentum descensus æquale toti gravitati globi exercetur in lineâ directionis ED; & per axioma 1. tota gravitas globi existit staticè in ipsâ lineâ ED, per quam impellit deorsum ipsum centrum.

*Corollarium:*

**S**En globus liberè descendat perpendiculariter, seu detineatur immotus a potentiâ D. tota ejus gravitas existit staticè solum in diametro ED normali ad horizontem; & impulsus æqualem toti gravitati exercet globus, vel causando descensum dum liber est ad illum, vel premendo totâ suâ gravitate potentiam D, dum ab eâ impeditur ne liberè descendat. Itaque si



globus liberè descendens perpendiculariter, tangat planum parallelum lineæ directionis, illud non premit gravitate ullâ; quia nullatenus ab eo impeditur ne descendat, & nulla gravitas globi existit staticè in diametro contactûs, normali ad tale planum. Si globus sustineatur a potentiâ D, & simul tangat planum parallelum diametro ED, premit potentiam D gravitate totali, ac non premit planum gravitate ullâ; quia descensum globi nullatenus impedit planum sed sola potentia, & gravitas tota existit staticè in diametro cui applicatur potentia, nulla gravitas existit in diametro cui applicatur planum.

Si autem globus neque descendat perpendi-  
cula-

culariter, neque sustineatur in diametro ED normali ad horizontem, sed sustineatur exempli gratia in circumferentiâ circuli ad horizontem paralleli, tota gravitas globi existit staticè in diametris incumbentibus circulo, nulla in diametro normali ad horizontem.

## PROPOSITIO IV.



**S**I linea rigida MN parallela horizonti sustineat globum V per filum MV, ac sustineatur a potentiâ N, cujus perpendicularum distet a perpendicularo globi; virtus sustentativa quam exercet potentia, est major totali gravitate globi.

Si perpendicularum potentiâ distet a perpendicularo globi, potentia exercet virtutem sustentativam, majorem eâ quam exercet, si idem sit perpendicularum globi & potentiâ, ut patet experientiâ. Sed si idem sit perpendicularum globi & potentiâ, hæc exercet virtutem parem gravitati globi, ex prop. I. Ergo si non sit idem perpendicularum, potentia exercet virtutem majorem gravitate globi: Porro globus exercet in hac hypothesi duas pressiones. Una est conatus tollendi impedimentum discensus perpendicularis. Altera est conatus faciendi, ut linea rigida MN evadat normalis horizonti. Prior harum pressio exercetur in perpendicularo globi, & æquatur gravitati ejus totali: adeoque additâ aliâ pressione, quæ exercetur in perpendicularo potentiâ, remoto a perpendicularo globi, duæ pressiones conjunctæ, sunt majores eâ, quam efficit sola gravitas totalis in perpendicularo globi. Quia verò, duabus pressioni-

bus



bus ac momentis, potentia resistit per virtutem æqualem toti aggregato: patet, cur potentia sustineat pressionem majorem eâ, quam efficit sola gravitas totalis in perpendicularo globi.

*Corollarium.*

**R**igida MN, per filum MV sustinet in M globum V, quia sustinetur a potentiâ N. Ergo si rigida MN non sustineatur a potentiâ, nequit sustinere globum per filum.

PROPOSITIO V.

**S**I lineæ rigidæ MN, IH horizonti parallelæ sustineant globos V & X, per fila MV, IX, ac sustineantur a potentiis N & H, quarum perpendiculara distent a perpendicularis globorum V & X; pressionem quas globi exercent in N & H, habent rationem compositam ex pondere totali globi V ad pondus totale globi X, & ex distantia MN ad distantiam IH.

Distantia MN ad distantiam IH sit ut diameter globi V ad diametrum globi X; ac distantia MN sit dupla distantia IH. Si globus V sit 16. librarum, globus X erit 2. librarum, ex 18. XII. Elem. Quia verò ex propos. 4. duæ pressionem quas exercet globus X sustentatus in H, sunt majores pressione, quam exercet sola gravitas totalis; pressio exercita in H sit 4. libr. dupla nimirum pressionis exercitæ in I. Si globus esset 16. libr. & sustineretur in H, exerceret in H pressionem 32. libr. Atqui globus V est 16. libr. ac distantia MN est dupla distantia IH. Ergo globus V exercet in N pressionem 64. librarum. Adeoque pressionem quas exercent globi V & X, habent rationem compositam ex pondere V 16. ad pondus N 2. & ex distantia MN

**MN** 4. ad distantiam **IH** 2. ac sunt ut numer. 16. multiplicatus per 4. ad numerum 2. multiplicatum per 2. quæ est ratio 16. ad 1. Porro distantias **MN**, **IH**, metiuntur lineæ horizonti parallelæ, quæ sunt rectæ ad sensum, at reipsâ sunt arcus ex centro Mundi: quia perpendiculara ponderum & potentiârum, quorum partes sunt rectæ **MV**, **IX**, & **NO**, **HL**, faciunt angulos in centro Mundi.

*Corollarium.*

**S**I recta **ME** sit æqualis rectæ **IH**, globus **V** sustentatus in **E** in distantia **EM**, exercebit pressionem 32. libr. veluti si globus **X** esset 16. libr. & sustineretur in **H**, Adeoque pressiones exercitæ a globo **V**, quem potentia sustineat divisim in **N** & in **E**, habent eandem rationem, quam habet numerus 16. multiplicatus per 4. ad numerum 16. multiplicatum per 2. quæ est ratio 2. ad 1. videlicet, si distantia **MN** reddat pondus **V**, veluti quadruplum ejusdem sustentati in **M**; distantia **EM** reddit illud veluti duplum ejusdem sustentati in **M**. quia in uno casu, pressio quam sustinet potentia in suo perpendiculo est quadrupla, in alio est dupla pressionis, quam efficit in suo perpendiculo gravitas totalis.

Neque interest, an globus **V** vel **X** detineatur immotus a potentia **N** aut **H**, vel transferatur ex uno loco in alium. Quamdiu enim potentia non finit, ut linea rigida, ex parallelâ evadat normalis horizonti, virtutem totius globi exhaurit momentum pressionis, quod sustinetur a potentia, & est majus totali gravitate globi. Adeoque non superest ulla virtus, quam exercere possit globus causando descensum.

*Quibus gravia tendunt deorsum . 31*



sum. Quæ dicuntur de globis suspensis per fila ex lineis horizonti parallelis, valent de globo, cujus perpendiculû sit MG, ac sustineatur in N aut in E; adeoque pendeat ex distantia MN vel

FE. Huc etiam facit corollariû propositionis 4.


*Scholion .*

**P**otentia I sustinet pressionem æqualem gravitati globi X seu longitudo fili ex quo pendet globus sit major, seu sit minor. Potentia verò H sustinet pressionem majorem gravitate globi; & hæc pressio eò est major, quò major fuerit latitudo ac distantia HI. Proinde si globus sustineatur a plano horizontali, sola diameter normalis horizonti, ac singulæ partes ejusdem diametri, carent staticè omni distantia a puncto contactûs. Et universaliter loquendo, si linea recta in quâ existat staticè quæcunque gravitas, insistat normaliter alicui plano, nulla pars talis rectæ habet staticè ullam distantiam a contactu plani; quia staticè consideratur distantia quoad latitudinem duntaxat, non verò quoad longitudinem, per Axioma 6.

#### PROPOSITIO VI.

**S**i planum imaginarium CS constet lineis rigidis CB, RS, parallelis horizonti, connexis per fila HQ, IP, horizonti normalia; idemque sit perpendiculum molis F pendentis in A ex rigida RS, ac potentiæ G sustentantis rigidam CB; relatè ad sustentationem in A, tota moles F est unum pondus, & existit staticè in perpendiculo AF: relatè ad sustentationes in H & I, tota moles F est divisa in duo pondera, quæ existunt staticè in rectis HQ, IP, & sunt re-

ci-



reciproca distantiarum HG, IG. Relatè ad sustentationem in G, aggregatum ex ponderibus HQ, IP, existit in perpendicularo GA. Pressiones autem quæ exercentur in rectis AF, GA, HQ, IP, sunt momenta solius gravitatis.

Planum imaginarium CS, ad sensum rectangulum (de quo in scholio lemmatis 5.) habet ut supponimus, easdem divisiones, cum plano reali ejusdem lemmatis 5. Quia verò, gravitas totius molis F, existens in perpendicularo AF ex propos. 1. communicatur toti plano CS; patet, gravitatem CS dividi in duas gravitates, DS, CT, sicut planum CS dividitur in duo plana, DS, CT. Atqui gravitates DS, CT, quæ ex lemmate 5. sunt reciproca distantiarum HG, IG, existunt staticè in rectis HQ, IP, occupantibus medium planorum DS, CT; quia fila HQ, IP, instar potentiarum sustinent pondus F suspensum ex RS. Ergo relatè ad rigidam CB, quæ pariter gerit munus duarum potentiarum, sustentantium in H & I fila HQ, IP, ac premitur eisdem filis tanquam ponderibus; pondus F est divisum in duo pondera, quæ existunt in rectis HQ, IP, & sunt reciproca distantiarum HG, IG: ac proinde habent centrum commune gravitatis in perpendicularo potentiaæ G, ex coroll. lemmatis 5. ac relatè ad sustentationem in G, aggregatum ex ponderibus HQ, IP, existit in eodem perpendicularo, & premit potentiam G. Demum ex ipsâ hypothesi, pondera quæ existunt in rectis AF, GA, HQ, IP,

nul -

nullatenus distant a potentiis A, G, H & I. Ergo pressiones quas exercent singula pondera, nequeunt esse momenta composita ex gravitatibus ac distantis. Adeoque sunt momenta solius gravitatis.

Hæc assertio quoad pressiones quæ sunt in rectis AF, GA, est indubitata. Ostendo rursus pressiones quæ sunt in rectis HQ, IP, esse momenta solius gravitatis. Nam in tales pressiones nihil influunt distantie AQ, AP, seu GH, GI. Alioquin, ubi tales distantie fierent majores vel minores, momenta evaderent majora vel minora, ex prop. 4. & 6. Sed hoc est falsum ex ipsâ hypothesi, quæ non limitat amplitudinem plani CS: adeoque si mutetur amplitudo CS; sed non mutetur figura & gravitas ipsius plani CS, nec mutetur proportio inter plana DS, CT, non mutantur pressiones quæ sustentur a filis HQ, IP. Ergo hæ pressiones non sunt momenta composita, sed sunt solius gravitatis. Et ex dictis in scholio lemmatis, mensuræ distantiarum HG, IG, & QA, PA, sunt arcus ex centro mundi, non autem sunt lineæ rectæ, nisi planum CS sit rectangulum geometricum. Porro ex defn. 6. rigida RS potest reduci ad vectem secundi generis, rigida CB ad vectem primi generis.

*Corollarium I.*

**P**ondus F sustentur a rigidâ RS in A, & existit staticè indivisum in perpendicularo AF. In punctis Q & P rigidæ RS, dividitur pondus F in duo pondera, quæ sunt reciproca distantiarum QA, PA, & existunt in rectis HQ, IP. Aggregatum horum ponderum existit in perpen-

C

pen-

pendiculo GA & sustinetur in G. Itaque relatè ad potentiam A, perpendiculum AF residet inter medietates ponderis F; relatè ad potentias H & I, quæ sunt omninò distinctæ, nam rigida CB exercet in H & I manus duarum potentiarum omninò distinctarum; recta GA residet inter pondera omninò distincta HQ, IP, quæ sunt reciproca distantiarum HG, IG, & non habent centrum commune gravitatis. Relatè ad potentiam G, perpendiculum GA residet inter medietates aggregati ex ponderibus HQ, IP, quæ reipsa sunt medietates ponderis F.


Loco rigidæ RS, quæ per molem F. tribuit gravitatem plano imaginario CS, potest adhiberi solidum, cujuslibet figuræ. Quia si rigida FE sit arcus ex centro mundi, ac duo fila HQ, IP, per quæ sustinet solidum PQ cujuscumque figuræ, sint ejus perpendiculara, idemque sit perpendiculum tum potentia G sustentantis rigidam FE, tum solidi PQ; rigida FE cum filis HQ, IP, non differt staticè a plano imaginario CS. Adeoque tota gravitas solidi PQ dividitur in duas partes, quæ existunt in rectis HQ, IP, ac sunt reciproca distantiarum HG, IG. Utrum autem solidum PQ quod habeat figuram cylindri, sit vectis secundi generis, colligi poterit ex propos. 19.

*Corollarium II.*

**S**I moles F pendens ex rigidâ RS sit 10. librarum, ac distantia IG ad distantiam HG sit ut 7. ad 3; in filo HQ existit pondus 7. libr. in filo IP existit pondus 3. libr. Itaque si sejungantur

*Quibus gravia tendunt deorsum.* 35.

gantur vectes, & ex vecte secundi generis RS ad horizontem parallelo pendeat moles F 10. libr. & distantia PA ad QA sit ut 7. ad 3; in perpendiculo molis F existit pondus 10. libr. & sustinetur a vecte per virtutem illi æqualem; in perpendiculo potentiz Q existit pondus 7. libr. & sustinetur a potentia Q per virtutem illi æqualem; in perpendiculo potentiz P existit pondus 3. libr. ac sustinetur a potentia P per virtutem illi æqualem. Ideo vectis detinet molem immotam, & potentiz detinent immotum ipsum vectem.




Similiter si ex vecte primi generis CB suspendatur moles H 7. libr. & moles I 3. libr.; ac distantia IG d HG sit ut 7. ad 3; in perpendiculo potentiz G sustinentis vectem CB parallelum hori-



zonti, existit centrum commune gravitatis molium H & I ex hac propos. & ex Galileo Dialogo II. de motu & machinis. Ergo gravitas aggregati ex molibus H & I, videlicet pondus 10. libr. existit staticè in perpendiculo potentiz G, quod residet inter medietates aggregati ex ipsis molibus ut ostendimus coroll. 1. ac momentum quo premitur potentia G non habens ullam distantiam ab ipso aggregato, illudque sustinens per virtutem æqualem, est solius gravitatis ex propos. 1. Pariformiter vectis CB detinet immotas duas moles H & I, quia exercet in H munus unius potentiz, quæ non habet ullam distantiam a mole H 7. libr. eamque susti-

net per virtutem æqualem; in I exercet munus alterius potentia, quæ non habet ullam distantiam a mole I 3. libr. eamque sustinet per virtutem æqualem; ut etiam patet ad sensum. Nam duæ moles H & I sustinentur a vecte CB in H & I quemadmodum sustinerentur in H & I a duabus potentiis non habentibus communicationem. Sed ab huiusmodi potentiis, moles sustinerentur per virtutem sibi æqualem ex propositione I. Ergo a vecte primi generis CB sustinentur per virtutem sibi æqualem. Itaque vectis CB horizonti parallelus manet necessario immotus, quia in H & I sustinet moles H & I per virtutem ipsis æqualem, & medietas molium H & I est ad dexteram, medietas ad sinistram punctorum H & I. potentia verò G ope vectis CB sustinet aggregatum ex molibus H & I per virtutem ipsi æqualem, & medietas aggregati est ad dexteram, medietas ad sinistram puncti G, ut optimè observat Galileus Dial. II.

## PROPOSITIO VII.



**S**I vectis primi generis CB, horizonti parallelus ac sustentatus a potentia G, sustineat moles H & I reciprocas distantiarum HG, IG; manet necessario in æquilibrio, quia in H exercet virtutem æqualem moli H, in I æqualem moli I, ac potentia G exercet virtutem æqualem aggregato ex molibus H & I.

Supponimus, vectem CB manere necessario in æquilibrio, si maneat necessario immotus, ac nequeat se detorquere a situ parallelo ad horizontem. Atqui ex coroll. 2. prop. 6. vectis CB

ma-



manet necessariò immotus, ac nequit se detorquere a situ parallelo ad horizontem. Ergo manet necessariò in æquilibrio. Et consequenter, centrum commune gravitatis molium  $H$  &  $I$ , quatenus incidit in perpendicularum potentiz  $G$ , potest vocari punctum æquilibrii, tum molium inæqualium  $H$  &  $I$ , quæ causant æquilibrio, ex puncto  $G$ , tum vectis ipsius  $CB$ , qui manet necessariò in æquilibrio.

*Corollarium I.*

**S**i augeatur sola distantia  $IG$  molis  $I$ , vectis  $CB$  amittit æquilibrio, ac descendente mole  $I$ , elevatur moles  $H$ ; quia centrum commune gravitatis molium  $H$  &  $I$  jam non incidit in perpendicularum potentiz  $G$ , sed translatum est versus  $C$ . Ex his corrui sententia Nicolai Tartaleæ, Libro VIII. Quæstionum & Inventionum diversarum, propos. 8. ubi docet, dari æquilibrio inter moles  $H$  &  $I$ , si sint reciprocarum distantiarum  $HG$ ,  $IG$ , quia moles  $I$ , non ratione sui, sed ratione sitûs ac distantiz  $IG$  conferentis augmentum gravitatis, est æquè gravis ac moles  $H$ . Si ergo augeatur distantia  $IG$ , censet non dari æquilibrio inter moles  $H$  &  $I$ , quia moles  $I$ , non ratione sui, sed ratione sitûs ac distantiz  $IG$  est gravior mole  $H$ . Huic sententiz accedit Vitalis Jordanus in Fundamento Doctrinæ motus gravium pag. 8. edit. primæ, ac plures alii, qui censent, in primo casu momentum molis  $I$  esse æquale, in secundo esse majus momento molis  $H$ . Verùm ex dictis patet, a distantia  $IG$  non conferri moli  $I$  augmentum ullius gravitatis, neque ullius momenti.

**S**imul & semel, moles inæquales  $H$  &  $I$  premunt vectem  $CB$  momento solius gravitatis; & aggregatum earum, ope vectis  $CB$  premit potentiam  $G$  momento solius gravitatis ex propos. 6. Ergo simul & semel, perpendiculum potentia  $G$ , respectu sustentationum quas exercet vectis  $CB$  in  $H$  &  $I$ , residet inter moles inæquales  $H$  &  $I$ ; ac respectu sustentationis quam exercet potentia  $G$ , residet inter medietates aggregati ex molibus  $H$  &  $I$ . Quæ omnia mirifice congruunt doctrinæ cl. Galilei Dial. II. ubi asserit, in vecte  $CB$  fieri æquilibrium duorum ponderum inæqualium  $H$  &  $I$ , sed cum aliquâ limitatione, nimirum ex puncto  $G$ . Moles enim, quæ quatenus sustententur a vecte  $CB$  in  $H$  &  $I$ , sunt inæquales, & nequeunt facere æquilibrium; quatenus sustententur in  $G$ , reducuntur ad æqualitatem, & causant æquilibrium ex puncto  $G$ , quia medietas aggregati ex molibus  $H$  &  $I$  est ad dexteram, ac medietas ad sinistram puncti  $G$ . Quomodo autem, relatè ad sustentationes, quas vectis  $CB$ , gerens munus duarum potentiarum omninò distinctarum, exercet in  $H$  &  $I$  erga moles  $H$  &  $I$ , perpendiculum potentia  $G$  sit linea solum imaginaria, quæ residet inter duo pondera inæqualia omninò invicem distincta, & proinde non habentia centrum commune gravitatis, patet ex coroll. I. propositionis 6.

## Scholion.

**I**N vectibus primi & secundi generis  $CB$ , anguli  $HAG$ ,  $IAG$ , quos perpendicularia potentiarum ac molium faciunt in centro mundi, metiuntur



tiuntur proportionem inter earum distantias, quaeunque figuram habeant vectes. Ac proinde, quod vectes sint arcus ex centro mundi, affert hanc utilitatem, ut ex ipsis possit sciri proportio inter distantias trium

perpendicularum. Alioquin proportionem



distantiarum necesse est indagare per arcus imaginarios ex centro mundi.

Si linea recta & rigida DB, sustineatur oblique in punctis D & B, ex eaque pendeat moles in O; rectae AD, BC sunt perpendiculara per suppos. 6. li-

neae verò AB, DC sunt arcus circulorum terrae concentricorum. Ergo ADCB



est rectangulum solum ad sensum. ac rectae BO, DO, non sunt ut arcus CM, DM, aut BL, AL, ut colligitur ex lemmate 2. & ex lemmate 6. Sed partes globi quae premunt potentias D & B, sunt reci-

procè ut arcus CM, DM, ex prop. 6. Ergo non sunt reciprocè ut rectae BO, DO. Adeoque recta BD non potest dici vectis obliquus, in quo rectae BO, DO, metiantur partes globi quae premunt potentias D & B.

#### PROPOSITIO VIII.

**R**atio cur vectis propositionis 7. maneat in æquilibrio, non est, quod moles H & I sint æquiponderantes, & habeant momenta invicem æqualia.

Ex cor. 2. prop. 6. moles  $H$  &  $I$  exercent momenta pressionum æqualia suis gravitatibus. Sed hoc non esset, si moles  $H$  &  $I$  æquiponderarent, & haberent momenta æqualia. Ergo &c.

*Scholion.*

**V** Jordanus in Fundamento pag. 12. edit. secundæ, ultro afferit, punctum  $G$  esse centrum commune gravitatis molium  $H$  &  $I$ . Censet nihilominus, æquilibrium vestis oriri ex eo, quod moles  $H$  &  $I$  exercent momenta æqualia medietatibus sui aggregati. Ubi vides, juxta Jordanum, punctum  $G$  residere tum inter momenta æqualia molium inæqualium  $H$  &  $I$ , tum inter moles ipsas inæquales: quum ex coroll. 2. prop. 6. punctum  $G$  resideat tum inter momenta inæqualia molium inæqualium  $H$  &  $I$ , tum inter moles æquales, videlicet inter medietates aggregati ex molibus  $H$  &  $I$ .

PROPOSITIO IX.

**R**atio cur vestis propositionis 7. maneat in æquilibrio, non est quod moles  $H$  &  $I$  se mutuò sustineant.

Ex prop. 7. vestis  $CB$  manet in æquilibrio, quia in  $H$  exercetur sustentatio æqualis moli  $H$ , in  $I$  æqualis moli  $I$ , in  $G$  æqualis aggregato ex duabus molibus. Ergo &c. Præterea ex 4. prop. si moles  $H$  &  $I$  se mutuò sustinerent, moles  $H$  premeretur momento composito ex gravitate  $I$  & ex distantia  $IH$ ; moles  $I$  premeretur momento composito ex gravitate  $H$  & ex distantia  $HI$ . Sed hæc sunt falsa. Ergo &c. Demum moles  $I$  est minor mole  $H$  ut suppono. Ergo moles  $I$  nequit sustinere molem  $H$ .


*Co-*

**E**X his etiam patet, rationem cur vectis CB maneat in æquilibrio, non esse, quia moles H & I sibi mutuò impendant descensum. Nihilominus, etiamsi transmittamus, quòd moles H & I sibi mutuò impendant descensum, ab iis differt potentia L quæ impediat descensum molis



A. Nam potentia L premitur totâ gravitate molis A; in vecte autem CB, nec moles H premitur ullâ gravitate molis I, nec moles I premitur ullâ gravitate molis H. Itaque non video sustineri posse doctrinam V. Jordani, assertantis in Fundamento, pag. 29. edit. pr. 2c pag. 91. & 96. edit. sec. *Singula duo gravia H & I se mutuo sustinere.* Addentisque, *potentiam L sustinendo grave A nullum aliud officium facere, quàm impedire quominus grave descendat.*

PROPOSITIO X.



**S**I vectis primi generis parallelus horizonti sustineatur in F, ac sustineat moles inæquales A & D, reciprocas distantiarum, AF, DF; ratio cur maneat in æquilibrio non est, quia si moveatur ab aliquâ potentiâ extrinsecâ circa punctum F, velocitates AH, DI, essent molium reciprocarum.

Ex hypothese, motus vectis nequit causari a ponderibus A & D, sed solum ab aliquâ potentiâ extrinsecâ. Ergo antecedenter ad motum, causandum a tali potetiâ, & ad velocitates AH, DI, quæ ex cor. 2. lem. 1. sunt ut distantia AF, DF, dantur constitutiva æquilibrii. Ergo &c.

*Scho-*

**P** Nic. Zucchi in Philosophiâ de Machinis, Parte III. sect. 2. censet, punctum F non esse centrum commune gravitatis molium A & D, sed solum esse centrum commune potentiz motivæ quam exercet moles A, & potentiz resistitivæ quam exercet moles D; & vicissim potentiz motivæ ac resistitivæ, quam exercent moles D & A. Æqualitatem verò talium potentiarum, putat esse causam æquilibrîi molium inæqualium A & D: quia non est ulla ratio, cur descendat una magis quam alia, & utrâ earum descendente, velocitates AH, DI, essent molium reciprocz. Verùm, præterquamquòd, æquilibrium non est molium inæqualium sed vectis; in puncto F datur centrum commune gravitatis molium A & D ex prop. 6; ac potentia resistitiva, æqualis potentiz motivæ molium A & D, exercetur solum a vecte in punctis applicationum A & D. Alioquin, ob puncta D & A, quæ incidunt in perpendicularia invicem distantia, potentia resistitiva D premeretur momento composito ex potentia motivâ A & ex distantia AD; potentia resistitiva A premeretur momento composito ex potentia motivâ D & ex distantia DA, per prop. 9. sed hæc sunt falsa. Ergo &c.

## PROPOSITIO XI.

**S**I vectis primi generis horizonti parallelus ac sustentatus in F, sustineat moles inæquales A & D, reciprocas distantiarum AF, DF; sentitur in F momentum solius gravitatis, quod ibi exercet aggregatum ex molibus A & D, quia moles A & D exercent in A & D momentum solius gravitatis.

Sup-

Supponimus ex coroll.2. prop.6. in F sentiri momentum solius gravitatis, quod ibi exercet aggregatum ex molibus A & D; ac momentum quod exercetur in F, esse æquale momentis simul sumptis, quæ exercentur in A & D. Ergo eatenus momentum quod sentitur in F est solius gravitatis, quia momenta quæ exercentur in A & D sunt solius gravitatis. Enimverò, ex prop.4. sentitur in N momentum majus gravitate molis V, quia in N exercetur momentum majus gravitate molis V. Ergo sentiretur in F momentum majus aggregato molium A & D, si tale momentum exerceretur in F. Exerceretur autem necessariò in F, si in A & D exercerentur momenta majora gravitatibus molium A & D.

*Scholion :*

**S**I hasta horizonti parallela sit valdè longa, & distantia AF, DF, seu sint majores seu sint minores, habeant eandem proportionem, sentitur in F momentum solius gravitatis, ut fateatur P. Franc. Eschinardus tom. 1. *Cursus Mathem.* appendice 6. Quia tamen, facilius frangitur hasta in F, si distantia AF, DF, sint majores quàm si sint minores; docet, præter momentum solius gravitatis quod sentitur in F, dari momenta distantiarum AF, DF, quæ non sentiuntur in F; sed aliquando ita invalescunt, ut causent fractionem hastæ in F.

Respondeo, fractionem hastæ non posse oriri ex momentis distantiarum AF, DF, quin aggregatum æquale illis momentis simul sumptis sentiatur in F, ut probatum est. Sed hoc non sentitur in F. Ergo fractio hastæ non oritur ex  
me-

momentis distantiarum; adeoque oritur solum ex momentis gravitatis molium  $A$  &  $D$ , quæ deprimendo brachia  $AF$ ,  $DF$ , dissolvunt eorum coherrentiam. Sed momenta gravitatis molium  $A$  &  $D$ , facilius deprimunt brachia  $AF$ ,  $DF$ , si distantiae  $AF$ ,  $DF$ , sint majores quàm si sint minores: quemadmodum, si loco hætæ sustineatur in suo perpendiculo trabs ponderosa horizonti parallela, duo ejus brachia facilius deprimuntur ab eadem omnino gravitate si trabs sit longior quàm si sit minus longa. Ergo ex momentis gravitatis molium  $A$  &  $D$ , facilius oritur fractio hætæ in  $F$ , si distantiae  $AF$ ,  $DF$  sint majores, quàm si sint minores.

PROPOSITIO XII.

**S**I vectis primi generis horizonti parallelus ac sustentatus in  $F$ , sustineat moles inæquales  $A$  &  $D$ , reciprocas distantiarum  $AF$ ,  $DF$ ; permanebit in æquilibrio, augendo simul, magis ac magis in eadem proportionem, molem  $A$ , non mutatâ distantiam  $AF$ , & distantiam  $DF$ , non mutatâ mole  $D$ .

In hac hypothese, moles  $A$  &  $D$  semper sunt reciprocae distantiarum  $AF$ ,  $DF$ . Ergo ex propof. 7. vectis permanet in suo æquilibrio.

*Corollarium.*


**M**oles  $D$  cujus aucta est sola distantia, & moles  $A$  cujus auctum est solum pondus, exercent momenta solius gravitatis ex coroll. 2. prop. 6. Ergo est imaginatio falsa, quòd moles  $D$ , ex applicatione ad vectem acquirat virtutem exercendi momentum majus & majus, & semper faciendi æquilibrio cum mole  $A$  majori & majori.

*Scho-*



**D**Ocent plures Autores, perpendiculum potentiae  $F$ , per accidens residere inter duas partes aequaliter graves; necessario autem residere inter duo momenta aequalia, licet momenta sint molium inaequalium  $A$  &  $D$ . Verum ex coroll. 2. prop. 7. patet, perpendiculum potentiae  $F$  necessario residere inter medietates aggregati ex molibus  $A$  &  $D$ ; ac momenta molium inaequalium esse necessario aequalia ipsis molibus.

PROPOSITIO XIII.



**S**I arcui rigido  $CB$  conexi sint radii rigidi  $HA, IA$ , ex quibus per filum  $AF$  pendeat globus  $F$ ; idemque sit perpendiculum  $LF$  globi  $F$ , & potentiae  $L$  sustentantis arcum  $CB$ : partes globi  $F$  quae existunt staticè in rectis  $HA, IA$ , ac

premunt arcum  $CB$  in  $H$  &  $I$ , sunt reciprocae arcuum  $HL, IL$ , & angulorum  $HAL, IAL$ ; eademque partes exercent momenta solius gravitatis.

Planum imaginarium  $LCAB$ , quod est sector parvi circuli, habet, ut supponimus, easdem divisiones cum sectore lemmatis 4, & sustentetur in suo perpendiculo  $LA$ ; seu manet in aequilibrio, perinde ac maneret in aequilibrio, si loco globi  $F$  pendentis ex  $A$ , rigidis  $HA, IA$ , infixi essent globi reciproci arcuum  $HL, IL$ , & angulorum  $HAL, IAL$ . Ergo in rigidis  $HA, IA$ , ex quibus pendet globus  $F$ , existunt partes globi,

globi, reciproce arcuum  $HL$ ,  $IL$ , & angulorum  $HAL$ ,  $IAL$ . Quia verò arcus  $CB$  in  $H$  &  $I$ , & superiores partes radiorum  $HA$ ,  $IA$ , erga inferiores, exercent eam virtutem, quam exercent duo radii in duobus punctis terminativis  $A$ , invicem compenetratis; constat ex propof. 1. momenta quibus tum arcus  $CB$  in  $H$  &  $I$ , tum radii  $HA$ ,  $IA$ , premuntur a partibus globi  $F$ , esse solius gravitatis. Porro ex defin. 6, arcus rigidus  $CB$  reduci potest ad vectem primi generis, quia sustinetur in  $L$ , ac sustinet in  $H$  &  $I$  duo pondera. Constat etiam, potentias applicatas rectis  $LF$ ,  $HA$ ,  $IA$ , non habere ullam distantiam a gravitatibus, quæ existunt staticè in illis rectis.

*Corollarium.*

**I**taque in filo  $AF$  existunt staticè partes globi  $F$  invicem distinctæ, quæ existunt in radiis  $HA$ ,  $IA$ . Et consequenter, lineæ obliquæ  $HA$ ,  $IA$ , staticè non differunt a perpendicularo  $AF$ , exercente munus duorum perpendicularorum. Idipsum confirmatur: quia si radii obliqui  $HA$ ,  $IA$ , differrent staticè a perpendicularo  $AF$ , magis ab eo differrent ubi essent magis obliqui, minus differrent ubi essent minus obliqui. Sed hoc est falsum, quia si mutetur amplitudo plani  $LCAB$ , sed non mutetur ejus gravitas, nec mutetur proportio inter partes  $BAD$ ,  $CAD$ , non mutatur gravitas partium  $BAD$ ,  $CAD$ , existens in radiis  $HA$ ,  $IA$ , ut patet ex ipsâ hypothesi, quæ non limitat amplitudinem plani  $LCAB$ , nec obliquitatem radiorum  $HA$ ,  $IA$ . Ergo radii obliqui  $HA$ ,  $IA$ , non differunt staticè a perpendiculararibus.

Scho-


**T** Aceri non debet discrimen linearum rigidarum a flexibilibus . Si enim duæ potentiz sustineant extremitates rigida , quæ habeat in medio globum liberè pendentem ex filo ; seu duæ medietates lineæ illius mutuò se tangant , & congruant cum perpendicularo globi , seu cum eodem perpendicularo faciant duos angulos invicem æquales ( quæcunque sit apertura talium angulorum infra angulos rectos ) vel demum tota linea sit penitus recta & parallela horizonti ; singulæ duæ potentiz , perinde sustinent medietatem globi , per virtutem & conatum præcisè æqualem ipsi medietati . Si autem linea non sit rigida , in primo duntaxat ex tribus casibus , potentiz exercent conatum æqualem medietati globi . Si verò medietates lineæ faciant angulos cum perpendicularo globi , singulæ duæ potentiz necessariò exercent duplicem conatum : primus est æqualis medietati globi , alius est æqualis violentiæ , quam patiuntur singulæ medietates lineæ , dum faciunt angulos cum perpendicularo globi ; & quò majores sunt anguli infra rectos , eò violentiæ sunt majores . Fortasse autem , linea non rigida , quæ sit onusta ingenti pondere , nequit pati tantam violentiam , ut constituat rectam horizonti parallelam .

Horum omnium veritas auribus percipietur , si linea non rigida de quâ dictum est , sit nervus sonorus . Nam pulsando utranque medietatem , in primo casu editur sonus minimùm acutus , in secundo casu sonus est magis acutus ; & si anguli fiant adhuc majores , etiam soni evadunt magis

magis acuti: Ergo licet in primo & secundo casu, medietates globi existant staticè in medietatibus nervi; nihilominus, hæ minimam tensionem habent in primo casu, majorem in secundo, maximam in tertio si est possibilis. Adeoque patet, augeri tensiones nervorum, & sonos evadere magis acutos, licet non augeantur partes globi quæ existunt in nervis obliquis. Est ergo evidens, in primo duntaxat casu, tensionem ac sonum æquari medietati globi, adeoque per tensiones ac sonos nervorum obliquorum non posse indagari partes globi quæ existunt staticè in nervis obliquis. Hæc autem doctrina locum habet etiam ubi anguli HAL, IAL, sint invicem inæquales.

Si centrum globi F congruat cum puncto A sectoris LCAB, omnia quæ dicta sunt de sectore, applicari debent globo, ut ostendimus in scholio lemmatis 5. eademque doctrina locum habet in semicirculo & in residuo sectoris. Nam hæc plana solum differunt, quòd in sectore angulus HAI sit acutus, in semicirculo sit rectus, in residuo sectoris sit obtusus. Itaque si globus A sustineatur per fila HA, IA, & per arcum concentricum CB, tota gravitas globi A existit in perpendiculo LA relatè ad sustentationem in L; ac recta LA residet inter medietates globi A. Eadem recta LA, relatè ad sustentationes in H & I, residet inter partes inæquales globi, quæ existunt staticè in rectis HA, IA, & sunt pondera totalia invicem distincta, & reciproca arcuum HL, IL, & angulorum HAL, IAL, ac non habent centrum gravitatis commune. Preinde, si ablato arcu CB, rigida sustinean-

lineantur eodem modo in H & I a duabus potentiis, non datur ulla sustentatio, nec datur existentia statica ullius gravitatis in perpendicularo LA, sed solum datur existentia statica partium globi A in rectis HA, IA; eademque partes sunt reciproce angulorum HAL, IAL, & arcuum imaginariorum HL, IL; premunt potentias H & I; ac sunt pondera invicem distincta, seu non habent centrum commune gravitatis.



Si rigida HA, IA sint radii arcus rigidi CB; radius verò LA sit perpendicularum globi V suspensi ex L, ac potentia A sustentis rigidas HA, IA; partes globi V quæ existunt in radiis HA, IA, & premunt potentiam A, sunt reciproce arcuum HL,

IL, & angulorum HAL, IAL. Itaque, si arcum CB unice sustineant duæ potentia in H & I, partes globi quæ premunt potentias, sunt reciproce arcuum HL, IL, & angulorum, quos radii imaginarii HA, IA, faciunt cum perpendicularo LA. Constat demum ex defin. 6, arcum CB sustentatum in H & I ac habentem pondus in L, posse reduci ad vectem secundi generis.

#### PROPOSITIO XIV.

**S**I globus A cujus perpendicularum sit AM, sustineatur in F & G; partes globi quæ existunt in radiis AF, AG, ac premunt potentias F & G, sunt reciproce angulorum FAM, GAM, & arcuum FM, GM; non verò sunt reciproce sinuum rectorum FR, GT.

Diametri FC, GB sint prolongata in H & I  
D per



*Quibus gravia tendunt deorsum . 51*

premitur toto pondere globi A, potentia F non premitur pondere ullo, sed merè tangit globum, ut poscit ratio reciproca.

PROPOSITIO XV.

**I**uxta hypothesim propositionis 14, in perpendiculo AM non existit staticè ulla gravitas globi A.

Globus A non descendit perpendiculariter, nec premit potentiam applicatam in M, & impediens descensum perpendicularem. Sed solum in alterutrâ hypothesi exercetur gravitatio & existit gravitas in perpendiculo AM ex cor. prop. 3. & scholio prop. 13. Ergo &c.

PROPOSITIO XVI.

**S**i globus A, cujus perpendiculum sit AM, sustineatur in F, & G; partes globi quæ non existunt staticè in radiis AF, AG, & non premunt potentias F & G, sunt ut anguli FAM, GAM; & ut arcus FM, GM; non autem sunt ut sinus recti FR, GT.

Si globus A sit 6. librarum, & angulus GAM sit duplus anguli FAM, pars quæ existit in radio AF est quadrilibris, pars quæ existit in radio AG est bilibris ex prop. 14. Ergo pars quæ non existit in radio AF, est bilibris, pars quæ non existit in radio AG est quadrilibris. Nam partes quæ non existunt in radiis AF, AG, sunt reciprocae partium quæ in eis existunt: imò pars gravitatis quæ existit in unquoque radio, est reciproca ejus quæ non existit in ipso & existit in alio radio. Sed partes quæ existunt in radiis AF, AG, sunt reciprocè ut anguli GAM, FAM. ex prop. 14. Ergo partes quæ non existunt in AF, AG, sunt ut ipsi anguli FAM,

D 2      \*      GAM,

GAM, & ex lemmate 2, non sunt ut sinus recti FR, GT, Id ipsum dicendum est de partibus, quæ non existunt in rectis HA, IA, juxta hypothefim propositionis 14.

*Corollarium.*

**S**I innotescant partes determinatæ globi, quæ premunt singulas potentias F & G, innotescunt partes globi, quæ non premunt easdem potentias, & simul innotescit gravitas absoluta totius globi. Ergo anguli FAM, GAM, expriment quantitates partiales globi, tum relativas, tum etiam absolutas.

PROPOSITIO XVII.



**S**I plana declivia RC, SC, seu sint seu non sint invicem normalia, faciant angulos RCA, SCD, cum rectâ horizontali AD, ac sustineant globum E in F & G: partes globi quæ existunt in radiis contactuum EF, EG, ac premunt singula plana, sunt reciprocè ut anguli SCD, RCA.

Ex prop. 14. partes quæ existunt in radiis EF, EG, ac premunt potentias F & G, nimirum premunt plana RC, SC, sunt reciprocè ut anguli GEI, FEI. Ergo ex lemmate 3, sunt reciprocè ut anguli SCD, RCA. Nam anguli SCD, GEI ex normalibus sunt æquales, ac similiter anguli RCA, FEI.

*Corollarium I.*

**I**Taque, partes globi E, quæ non existunt in radiis contactuum EF, EG, & non premunt plana RC, SC, sunt ut anguli RCA, SCD, ex prop.



prop. 16. ac mutatis angulis  $RCA, SCD$ , sed non mutatâ eorum proportione, non mutantur partes quę premunt ac partes quę non premunt singula plana. Mutatur autem proportio angulorû, quoties mutatur solum unus e duobus angulis.

*Corollarium II.*

**S**inus recti  $SO, RN$ , invicem paralleli, ac normales rectę horizontali  $AD$ , sunt ut sinus recti  $GH, FM$ , ex coroll. 2. lemmatis 3. Atqui ex prop. 16, partes globi quę premunt potentias  $F \& G$ , non sunt reciprocę ut sinus  $GH, FM$ . Ergo partes quę premunt plana  $RC, SC$ , non sunt reciprocę ut sinus  $SO, RN$ . Similiter partes quę non premunt plana  $RC, SC$ , non sunt ut sinus  $RN, SO$ , neque ut sinus  $FM, GH$ .

*Scholion.*

**T**riangula  $RNC, COS$ , non sunt rectilinea nec rectangula, ut a nobis accipiuntur. Nam linea horizontalis  $AD$  non est recta sed curva; & perpendicula  $RN, SO$ , non sunt invicem parallela, sed faciunt angulos in centro Mundi. His tamen non obstantibus, demonstrationes nostrę sunt geometricę in toto rigore. Nam quę dicuntur de angulis  $RCN, SCO$ , vera sunt ratione angulorum  $FEI, GEI$ , qui in toto rigore sunt rectilinei.

PROPOSITIO XVIII.

**S**i globus  $E$  nitatur planis declivibus  $RC, SC$ ; duę pressiones quas plana sustinent in contactibus  $F \& G$ , sunt momenta solius gravitatis; easque causant partes determinatę globi, quia partes illę existunt in radiis  $EF, EG$ , normalibus ad ipsa plana  $RC, SC$ .

Seu plana  $RC, SC$ , sint seu non sint invicem normalia, pressiones quas plana sustinent in  $F$  &  $G$ , non sunt momenta composita ex gravitate ac distantia, sed sunt momenta solius gravitatis ex prop. 13. & ex coroll. 1. prop. 14. Sed ideo sunt momenta solius gravitatis, quia partes globi ex quibus oriuntur, non habent ullam distantiam a contactibus  $F$  &  $G$ : videlicet juxta scholion prop. 5. quia existunt staticè in radiis  $EF, EG$ , normalibus ad plana  $RC, SC$ . Ergo si globus &c.

*Corollarium I.*

**I**N sensu composito quòd globus sustineatur a planis  $RC, SC$ , omnis descensus globi est impossibilis, ac nulla pressio exercetur in perpendiculo  $EI$  ex prop. 15. Ergo duæ tantum pressiones exercentur a globo  $E$  in radiis  $EF, EG$ , quæ ordinantur immediatè ad tollenda impedimenta descensus perpendicularis, non autem ad ipsum descensum. Alioquin, singula puncta radiorum  $EF, EG$ , exercerent duas reales pressiones, unam per lineam obliquam  $EF$  vel  $EG$ ; aliam per lineam perpendicularem, quod est impossibile.

*Corollarium II.*

**S**I arcus  $FIG$  esset linea rigida cum pondere in  $I$ , potentia  $F$  &  $G$  premerentur pondere illo, reciprocè ad arcus  $FI, GI$ ; & arcus  $FIG$  esset vectis secundi generis ut ostendimus in scholio prop. 13. Hinc tamen non sequitur, arcum  $FIG$  globi  $E$  esse vectem, quia in radio  $EI$  non exercetur ulla pressio ex prop. 15. adeoque pondus nullo modo est in  $I$ .

PRO-

PROPOSITIO XIX.

**S**I plana declivia RC, SC, seu sint seu non sint normalia, sustineant in F & G globum E: recta FG, quam secat in L perpendicularum, EI ex centro globi, non gerit munus vectis cum pondere in L.

Recta FG nequit esse vectis cum pondere in L, nisi pondus sit applicatum in L, ac partes ejus sint reciprocè ut rectæ GL, FL, ut colligitur ex dictis in scholio prop. 7. Sed neutrum verificatur. Nam in perpendicularo LI ex prop. 15. non fit ulla pressio, adeoque nullum pondus existit in L: partes verò quæ premunt plana RC, SC, sunt reciprocè ut arcus GI, FI, ex prop. 14, adeoque non sunt reciprocè ut rectæ GL, FL, quæ sunt ut rectæ GH, FM ex lemmate 6. Ergo recta FG non est vectis.



Similiter, ex hypothese quòd plana DC, EC, sint normalia, & sustineant globum O, recta FH non est vectis cum pondere in R. Quia in perpendicularo OR non fit ulla

pressio; partes verò quæ premunt plana DC, EC, non sunt reciprocè ut rectæ HR, FR; videlicet ex coroll. 2. lemmatis 6, non sunt reciprocè ut perpendiculara HM, FL.

Corollarium.

**E**X his refellitur Vitalis Jordanus, qui in suo Fundam. prop. 13. & 15: docet, rectam FH esse vectem cum pondere in R. Corruit etiam assertio A. Marchetti in rationibus X. Conclusionum pag. 33, quod globus O, tres pressiones exerceat, in perpendicularis FL, HM, OR.

## PROPOSITIO XX.

**S**I plana declivia  $DM$ ,  $EM$ , sustentia globum  $A$  sint normalia; partes globi quæ



**T**

existunt staticè in radiis contactuum  $AF$ ,  $AG$ , & premunt plana  $DM$ ,  $EM$ , sunt ut anguli  $DMT$ ,  $EMT$ , quos ipsa faciunt cum perpendicularo  $HM$ .

Ex lemmate 3, anguli  $DMT$ ,  $EMS$ , sunt æquales, & similiter anguli  $EMT$ ,  $DMR$ . Sed partes globi quæ existunt staticè in radiis  $AF$ ,  $AG$ , & premunt plana  $DM$ ,  $EM$ , sunt reciproce ut anguli  $EMS$ ,  $DMR$ , ex prop. 17. Ergo sunt ut anguli  $DMT$ ,  $EMT$ . Porro propter angulum  $FAG$  rectum, globus sustentatus in  $F$  &  $G$ , non differt staticè a semicirculo  $CLB$  qui sit gravis, & sustineatur in  $H$  &  $I$ . Videatur scholion prop. 13.

## Corollarium.

**A**nguli  $DMR$ ,  $EMS$ , metiuntur partes globi  $A$  quæ non premunt plana  $DM$ ,  $EM$ , ex coroll. 1. prop. 17. anguli  $DMT$ ,  $EMT$ , metiuntur partes globi quæ premunt plana  $DM$ ,  $EM$ , ex hac propos. Quemadmodum autem eadem apertura est anguli  $DMR$  &  $EMT$ , ita eadem pars globi non premit planum  $DM$ , & premit planum  $EM$ . Sicut eadem apertura est anguli  $EMS$  &  $DMT$ , ita eadem pars globi non premit planum  $EM$  & premit planum  $DM$ . Jam si plana normalia  $DM$ ,  $EM$ , unà cum globo moveantur ab aliquâ potentiâ circa centrum  $M$  versus  $S$ , dum planum  $DM$  congruit cum perpendicularo  $TM$ , planum  $EM$  congruit cum

cum rectâ horizontali SM. Anguli DMT, EMS evanescunt, anguli DMR, EMT evadunt recti; globus non premit planum DM seu TM gravitate ullâ, & premit planum EM seu SM gravitate totali. Ergo quemadmodum, si plana normalia DM, EM sint declivia, ex angulis æqualibus acutis EMS, DMT, prior metitur partem globi quæ non premit planum declive EM, alius metitur eandem partem quæ premit planum declive DM; ex angulis æqualibus acutis DMR, EMT, prior metitur partem globi quæ non premit planum declive DM, alius eandem partem quæ premit planum declive EM: ita si planum DM congruat cum perpendicularo TM, & planum EM cum rectâ horizontali SM; ex angulis rectis TMR, SMT, prior metitur totum globum qui nullatenus premit perpendicularum TM, alius metitur eundem globum qui totâ gravitate premit planum SM. Et consequenter, pars globi quæ premit planum declive DM vel EM, ad totum globum qui premit rectam horizontalem SM, est ut angulus acutus DMT vel EMT, ad rectum SMT: pars globi quæ non premit planum declive DM vel EM, ad totum globum qui nullatenus premit perpendicularum TM, est ut angulus acutus DMR vel EMS, ad angulum rectum TMR.

PROPOSITIO XIX.

**S**I globus A sustineatur a planis normalibus DM, EM, anguli DMT, EMT, quos plana declivia faciunt cum perpendicularo TM, sunt anguli inclinationis: anguli EMS, DMR, quos plana declivia faciunt cum rectâ horizontali RS, sunt anguli elevationis.

Ex

Ex coroll. prop. 20. pars globi quæ premit planum inclinatum DM vel EM, ad totum globum qui premit rectam horizontalem, est ut angulus acutus DMT, vel EMT, ad rectum SMT. Pars globi quæ non premit planum elevatum, DM vel EM, ad totum globum qui nullatenus premit planum verticale TM, est ut angulus acutus DMR vel EMS, ad rectum TMR. Ergo per axioma 3, anguli DMT, EMT; seu per axioma 5, anguli MDN, MEO, sunt anguli inclinationis. Anguli DMR, EMS, sunt anguli elevationis.

*Corollarium.*

**U** Numquodque duorum planorum declivium DM, EM, est potentia impediens descensum globi super altero plano. Ergo juxta coroll. 1. propof. 14. pressiones quas sustinent planum DM & potentia G, sunt momenta solius gravitatis, & æquantur partibus globi quæ existunt in radiis AF, AG; pressiones quas sustinent planum EM ac potentia F, sunt momenta solius gravitatis, & æquantur partibus globi quæ existunt in radiis AG, AF. Rursus ex lemmate 3, angulus elevat. unius plani est æqualis angulo inclin. alterius plani. Ergo partes globi A quæ existunt in radiis AF, AG, parallelis ad plana EM, DM, ac non premunt plana EM, DM, sed premunt potentias F & G, sunt ut anguli elevat. EMO, DMN. Partes globi, quæ existunt in radiis AG, AF, normalibus ad plana EM, DM, & premunt eadem plana EM, DM, sunt ut anguli inclin. MEO, MDN. Itaque si consideremus, globum sustineri a plano DM & a potentiâ G, tota gravitas globi est divisa

visa solum in duas partes . Una existit in radio AF normali ad DM , ac premit ipsum planum DM ; altera existit in radio AG parallelo ad DM, ac non premit planum DM sed potentiam G; atque una pars est reciproca alterius : nulla autem pars globi existit in radio AP normali ad horizontem ex prop. 15. Eademque doctrina locum habet , si consideremus globum sustineri a plano EM & a potentiâ F . Porro si globus A sit 6. librarum , & angulus elevat. DMN sit 30. graduum, angulus inclinat. MEO est 30. grad. angulus verò tum elevat. EMO , tum inclin. MDN est 60. grad. Pars bilibris globi A premit potentiam G , pars quadrilibris premit planum DM . Pars autem bilibris ad quadrilibrum , est ut angulus elev. DMN 30. grad. ad angulum inclin. MDN 60. grad. & una pars est reciproca alterius , sicut unus angulus est reciprocus alterius . Pars quadrilibris premit potentiam F , pars bilibris premit planum EM . Pars autem quadrilibris est reciproca partis bilibris , sicut angulus elev. EMO est reciprocus anguli inclin. MEO . Possunt etiam disjungi plana DM, EM , itaut globi æquales sustineantur, unus a plano DM & a potentiâ G; alius a plano EM & a potentiâ F . Quæ dicuntur de angulis elev. DMN , EMO , & inclin. MEO , MDN , vera sunt ratione angulorum FAP , GAP, qui sunt rectilinei , & simul sumpti constituunt angulum rectum FAG , ut notavimus in scholio propos. 17.

PROPOSITIO XXII.

**S**I globus A nequeat descendere super plano EM, propter obicem potentiæ F applicatæ

catæ radio AF parallelo ad EM; pars globi quæ existit in radio AF & premit potentiam F, ad totum globum, est ut angulus elev. EMO ad angulum rectum. Si globus A nequeat descendere super plano DM, propter obicem potentia G applicatæ radio AG parallelo ad DM; pars globi quæ existit in radio AG & premit potentiam G, ad totum globum, est ut angulus elevat. DMN ad rectum.

Juxta hypothesim de quâ in coroll. prop. 21, partes globi quæ existunt in radiis AF, AG, parallelis ad EM, DM, ac premunt potentias F & G, sunt ut anguli elev. EMO, DMN. Eademque partes ad totum globum ex coroll. prop. 20. sunt ut anguli EMO, DMN, ad rectum. Ergo pars globi quæ existit in radio AF & premit potentiam F, ad totum globum, est ut angulus elevat. EMO ad rectum. Pars quæ existit in AG & premit potentiam G, ad totum globum, est ut angulus elevationis DMN ad rectum.

*Corollarium.*

**I**Taque per lemma 2, pars globi quæ existit in radio AF, & premit potentiam F, ad totum globum, non est ut sinus rectus GL ad sinum totum GA; neque ut sinus rectus EO ad sinum totum EM. Pars globi quæ existit in radio AG & premit potentiam G, ad totum globum, non est ut sinus rectus FI ad sinum totum FA; neque ut sinus rectus DN ad sinum totum DM.

*Scho-*





**P** Eschinardus tomo 1. Cursus Mathem. Append. 4. docet, potentiam  $F$  quæ detineat globum immotum per applicationem ad radium  $FA$  parallelum plano  $EM$ , resistere ad æqualitatem parti gravitatis, quæ causaret descensum globi super plano declivi  $EM$ , si abesset potentia  $F$ . Ergo legitimè arguendo juxta hæc principia, verissima, pars gravitatis quæ causaret descensum globi super plano declivi  $EM$ , ad totam gravitatem, est ut angulus elevat.  $EMO$  ad rectum; ac nullo modo est ut sinus rectus  $GL$  aut  $EO$ , ad sinum totum  $GA$  vel  $EM$ . Videatur scholion propof. 26.

PROPOSITIO XXIII.

**S**I in triangulis rectangulis æqualibus  $DNM$ ,  $EOM$ , invicem sejunctis, hypotenusæ  $DM$ ,  $EM$  sint plana inæqualiter declivia, bases verò  $NM$ ,  $OM$  sint parallelæ horizonti, & globi æquales nequeant descendere super planis  $DM$ ,  $EM$ , propter obicem potentiarum  $G$  &  $F$ , quæ sint applicatæ radiis  $GA$ ,  $FA$  globorum parallelis ad plana  $DM$ ,  $EM$ : partes globorum quæ existunt staticè in radiis  $AG$ ,  $AF$ , & premunt potentias  $G$  &  $F$ , sunt ut anguli elev.  $DMN$ ,  $EMO$ : partes globorum quæ existunt in radiis  $AF$ ,  $AG$ ; & premunt plana  $DM$ ,  $EM$ , sunt ut anguli inclin.  $MDN$ ,  $MEO$ .

In triangulis  $DNM$ ,  $EOM$  sejunctis, bases supponuntur parallelæ horizonti, ut angulus elev. unius plani declivis æquetur angulo inclin. alterius plani juxta lemma 3. Itaque si globi sint 6. libr. & angulus elev.  $DMN$  sit 30. grad. angulus inclin.  $MEO$  est 30. grad. angulus

lus elev. EMO & inclin. MDN est 60. grad. Pars bilibris unius globi existit in radio AG & premit potentiam G; pars quadrilibris alterius globi existit in AF & premit potentiam F, ut patet ex coroll. prop. 21. Pars verò bilibris ad quadrilibrem est ut angulus elev. DMN 30. grad. ad angulum elev. EMO 60. grad. Similiter pars quadrilibris unius globi existit in AF & premit planum DM; pars bilibris alterius globi existit in AG & premit planum EM. Pars autem quadrilibris ad bilibrem est ut angulus inclin. MDN 60. grad. ad angulum incl. MEO 30. grad. Ergo tota propositio est manifesta.

*Corollarium I.*

**I**N eisdem planis DM, EM sejunctis, pars bilibris unius globi quæ existit in AG & premit potentiam G, una cum parte quadrilibris alterius globi æqualis, quæ existit in AF & premit potentiam F, æquatur totali gravitati uniuscujusque globi, quæ est 6. libr. sicut angulus elev. DMN 30. grad. una cum angulo elev. EMO 60. grad. alterius plani æquatur angulo recto. Pars quadrilibris unius globi quæ existit in AF & premit planum DM, una cum parte bilibri alterius globi quæ est in AG & premit planum EM æquatur totali gravitati, sicut angulus inclin. MDN 60. grad. una cum angulo inclin. MEO 30. grad. æquatur angulo recto.

*Corollarium II.*

**I**N eisdem planis sejunctis, pars unius globi quæ existit in radio AG & premit potentiam G, ad partem ejusdem globi quæ premit planum DM est ut angulus elev. DMN ad angulum

gulum inclin. MDN ejusdem plani DM. Pars alterius globi quæ premit potentiam F, ad partem ejusdem globi quæ premit planum EM est ut angulus elev. EMO ad angulum inclin. MEO ejusdem plani EM. Pars unius globi quæ premit potentiam G, æquatur parti alterius globi quæ premit planum EM, sicut angulus elev. DMN, æquatur angulo inclin. MEO. Pars unius globi quæ premit potentiam F, æquatur parti alterius globi quæ premit planum DM, sicut angulus elev. EMO, æquatur angulo inclin. MDN.


PROPOSITIO XXIV.

**S**I duo plana declivia sustentia globum, non sint normalia, partes globi quæ premunt singula plana, non sunt ut eorum anguli inclinationis; partes quæ non premunt singula plana, non sunt ut eorum anguli elevationis.

Mutatis inclinationibus & elevationibus planorum, ac non mutatâ proportionem angulorum, quos plana declivia faciunt cum rectâ horizontali, non mutantur partes globi, tum quæ premunt, tum quæ non premunt singula plana, ex prop. 17, & ex coroll. ejus 1. Ergo &c.

PROPOSITIO XXV.

**S**I globi B & A nequeant descendere, unus perpendiculariter, propter obicem potentia C, applicatæ diametro CE normali ad horizontem; alius super plano declivi DM, propter obicem potentia G, applicatæ diametro GL parallelæ ad DM; globi verò A & B sint reciproce ut anguli N & M trianguli rectanguli DNM, seu globus B ad globum A sit ut angulus



angulus elev.  $M$  ad rectum  $N$ : potentia  $C$  &  $G$  gravantur æqualiter.


Angulus elev.  $M$  sit subtriplex anguli recti  $N$ , & globus  $B$  sit unius libræ,

adeoque globus  $A$  sit 3. libr. potentia  $C$  sustinet unam libram ex propof. 1. & similiter potentia  $G$  ex propof. 22. Ergo &c. Idem dicendum est de potentiis  $C$  &  $G$ , si tempore æquali elevent ipsos globos per easdem diametros  $CE$ ,  $GL$ . Neque una elevatio est violentior vel difficilior aliâ: nam ex coroll. prop. 7. applicatio ad lineam obliquam  $GL$ , staticè non differt ab applicatione ad lineam perpendiculararem  $CE$ .

*Corollarium.*

**S**I supponamus, momentum globi  $A$  descendens super plano declivi  $DM$ , ad momentum totale ipsius globi descendens perpendiculariter, esse ut globum  $B$  ad globum  $A$ ; momentum globi  $A$  descendens super  $DM$  æquatur gravitati unius libræ, quæ existit in diametro  $LG$  parallelâ ad  $DM$ ; sicut momentum ejusdem globi  $A$  descendens perpendiculariter, æquatur gravitati trilibri, quæ dum globus descendit perpendiculariter, existit in diametro normali ad horizontem. Sed gravitas unius libræ ad gravitatem trilibrem, est ut angulus elev.  $DMN$  30. grad. ad angulum rectum. Ergo momentum ad momentum, est ut angulus elev. ad rectum; & ex lemmate 2, non est ut sinus rectus  $DN$  ad sinum totum  $DM$ .

PRO-




**S**I globi B & A pro-  
positionis 25. deti-  
neantur immoti a poten-  
tiâ Q per filum BQA,  
cujus una pars sit norma-  
lis horizonti, altera sit  
parallela plano declivi

DM; ac supponamus, conatum quem adhibet  
potentia Q nullatenus differre a conatibus simul  
sumptis, quos adhibent potentia C & G pro-  
positione 25. globus B ad globum A est ut an-  
gulus elev. M ad rectum N.

Patet ex prop. 25. Quare autem apposita  
fuerit ea conditio, videatur scholion prop. 13.

*Corollarium I.*

**P**Ars globi A quam non sustinet planum DM,  
& globus B, exercent momenta pressio-  
num æqualia, & iæcirco duo globi manent im-  
moti. Ergo totus globus A & totus globus B  
non exercent momenta pressio-  
num æqualia. Et licet duo globi inæquales maneant immoti,  
non tamen sunt æquiponderantes, nec faciunt  
æquilibrium.



Si iidem globi sint in-  
ferti lineis rigidis DM,  
DN, quæ transeant per  
centra globorum, & sinant  
illos liberè descendere,  
descensus verò impedian-  
tur per filum ex quo globi sint suspensi, ac filum  
ipsum sustineatur in puncto D: vertex D trian-  
guli gerit munus potentia, quæ utrumque glo-  
bum detineat immotum.

E

Co-


## Corollarium II.

**S**I globus A sustineatur in G & F, partes quæ existunt in radiis AG, AF, ac premunt potentiam G & planum DM, sunt reciproce ut anguli FAR, GAR, ex prop. 14. & in radio AR non existit staticè ulla gravitas ex prop. 15. Itaque si globus sustineatur in F & Q, pars globi quæ existit in rectâ QA, ad partem quæ existit in rectâ FA, est ut angulus elev. M ad angulum inclin. D, ex coroll. prop. 21. nam angulus GAR ex parallelis ad angulum inclin. est illi æqualis; angulus FAR ex normalibus ad angulum elev. est illi æqualis ex lemmate 3.

## Corollarium III.



**S**I una potentia trahat sursum fila BD, BC, quæ transeant per foramen positum in B, & habeant in D & C pondera reciproca angulorum D & C trianguli rectanguli BDC; potentia sustinet pondus D & partem ponderis C æqualem ponderi D, pondus verò D ad pondus C, est ut angulus elev. C ad rectum ex prop. 25, & 26. ac non est ut sinus rectus BD ad sinum totum BC ex lemmate 2. Idipsum dico, si duæ partes fili, quibus alligati sint duo globi propositionis hujus 26. transeant per foramen positum in Q, ac trahantur sursum a potentiâ. Si autem in triangulo rectangulo DNM, rectæ DN, IM, sint æquales, ac recta IP sit normalis ad NM; adeoque recta DM ad IM seu ad DN, sit ut DN ad IP, ex 2. VI; ac supponamus, filum cum globis A & B sustineri in Q a potentiâ, quæ sinat filum liberè excurrere, globum verò



verò B trahi deorsum ab aliâ potentiâ ex D in N, ut eodem tempore globus A promoveatur ex M in I; neganda est consequentia hujus enthymematis : Dum globus B descendit ex D in N, globus A qui promovetur ex M in I, ascendit perpendiculariter ex P in I. Ergo globus B ad globum A est reciprocè ut recta IP ad IM, velut sinus rectus DN ad sinum totum DM; ac non est ut angulus M ad N. Supponitur in hoc argumento, globos A & B esse reciprocos velocitatum PI, DN; atque hinc oriri, ut globi inæquales æquiponderent, ac nequeant moveri nisi a potentiâ extrinsecâ: quæ omnia corruunt ex prop. 8. & 9.

Similiter si in triangulo rectangulo BDC, rectæ HD, EC, sint æquales, ac recta EA sit normalis ad DC; una verò potentia trahat sursum fila BD, BC, ut nuper dicebam: neganda est consequentia hujus enthymematis: Dum potentia ascendit ex B in F, pondus D ascendit ex D in H, & pondus C quod promovetur ex C in E, ascendit perpendiculariter ex A in E. Ergo pondus D ad pondus C, est ut recta EA ad EC, & ut sinus rectus BD ad sinum totum BC. Videatur scholion prop. 52.

*Scholion.*

**G**alileus in addit. ad Dial. III. de motu, Stevinus lib. I. Staticæ prop. 19, & alii asserunt, *Momentum parziale gravis ut descendat per planum DM, ad momentum totale ut descendat perpendiculariter, esse ut pondus B ad pondus A.*


E 2

Ita;





eam quam sustinet potentia E est ut angulus in-



clin. BAD ad angulum elevat. ABD , ex coroll. 2. prop. 26. ac pars globi V quam sustinet planum AF , ad eam quam sustinet potentia G , est ut angulus inclin. FAD ,

ad angulum elev. AFD . Sed si globus T sit 6. libr. globus V sit 3. libr. angulus elev. AFD sit 60. gr. angulus elev. ABD sit 30. gr. nimirum si pondera globorum sint reciprocè ut anguli elev. planum AB sustinet 4. libras , potentia E sustinet 2. libras , ut exigit proportio anguli incl. 60. gr. ad angulum elev. 30. grad. Planum AF sustinet unam libram , potentia G sustinet 2. libras , ut exigit proportio anguli inclin. 30. gr. ad angulum elev. 60. gr. ac potentia E & G sustinent singulæ 2. libras . Ergo &c.

Neque opus est ut triangula rectangula ADB, FDA sint similia . Si enim globus V sit 6. libr. globus T sit 9. libr. & angulus elev. F sit 60. gr. angulus elev. B sit 40. gr. planum AB sustinet 5. libras , potentia E sustinet 4. libras , ut exigit proportio anguli incl. 50. gr. ad angulum elev. 40. gr. Planum AF sustinet 2. libras , potentia G sustinet 4. libras , ut exigit proportio anguli incl. 30. gr. ad angulum elev. 60. gr. Ergo &c.

*Corollarium I.*

**I**taque si globi T & V detineantur immoti a potentia C per filum , cujus partes sint parallelæ planis AB, AF ; ac supponamus , applicationem in C staticè non differre ab applica-

tionibus in E ac G simul sumptis : potentia C sustinet ex utroque globo eadem partes invicem æquales, quas antea sustineri diximus a potentiis E & G .

*Corollarium II.*

**S**I globi T & V, inserti lineis rigidis AB, AF, essent suspensi ex filo sustentato in A & manerent immoti; vertex A gereret munus potentia C, vel duarum potentiarum E & G. Hanc eandem suppositionem adhibuit cl. Torricellius prop. 2. de motu gravium .

*Scholion.*




**S**I globi R & S sustineantur a planis declivibus AF, DB, & a potentiis C & E in diametris parallelis ad plana; pondera ve-

rò globorum R & S sint reciproce ut anguli inclin. D & A; plana AF, DB gravantur æqualiter. Nimirum si angulus D sit 60. gr. angulus A sit 30. gr. globus R sit 6. libr. globus S sit 3. libr. planum AF gravatur 2. libris, potentia C gravatur 4. libris. Planum DB gravatur 2. libris, potentia E gravatur unâ librâ. Si angulus D sit 50. grad. angulus A sit 30. grad. globus R sit 15. libr. globus S sit 9. libr. planum AF gravatur 5. libris, potentia C 10. libris; planum DB 5. libris, potentia E 4. libris.

**PROPOSITIO XXVIII.**

**S**I globi A & B propositionis 26. maneat immoti, non habent centrum gravitatis commune.

Ex cor. 1. prop. 14. duæ partes globi A quæ susti-




sustinetur in F & Q non habent centrum gravitatis commune, utpote pondera distincta existentia in lineis diversis. Ergo globus A & globus B non habent centrum gra-

vitatis commune.

*Corollarium I.*

**P**ars globi A quæ sustinetur in Q per filum QA, staticè non differt a pondere totali suspenso ex Q per filum QB, ex coroll. propos. 13. Itaque pars globi A quæ non sustinetur a plano DM, & globus B, licet sint pondera æqualia ex prop. 26; nihilominus quatenus habent communem sustentationem in Q sunt staticè unum pondus, & habent centrum commune gravitatis. Pars autem globi A quæ sustinetur a plano DM, staticè est pondus distinctum ab aliâ parte, quæ unâ cum globo B sustinetur a potentiâ; ac proinde habet centrum gravitatis peculiare.


*Corollarium II.*



**P**artes globorum T & V, quæ sustinentur a potentiâ C per filum, ut diximus coroll. I. propos. 27, habent unum centrum commune gravitatis; partes verò quæ sustinentur a planis AB, AF, habent centra gravitatis peculiariora; quia duo globi sunt staticè tria pondera; unum sustinetur a potentiâ C, aliud a plano AB, aliud a plano AF.

**E** Vangelista Torricellius initio sui Operis de Motu Gravium postulat aliquid, quod iudice P. Eschinardo in tractatu de Impetuum. 53, non potest illi negari. Videlicet postulat, *globos T & V, alligatos filo non posse moveri, nisi debeat descendere centrum gravitatis commune*. Jam autem constare arbitror, postulatum illud niti falso supposito, ac non posse concedi.

## PROPOSITIO XXIX.



**S**I in vecte primi generis CAB sustentato in A, pondera F & G sint æqualia, pars verò AB ipsius vectis sit parallela horizonti, pars AC sit elevata, ductoque perpendiculo DC, &

prolongatâ BA in D, sit BA minor quàm DA: pondus G descendit virtute illius partis gravitatis, ob quam pondus G ad pondus F habet rationem reciprocè majorem, quam habeat distantia BA minor ad distantiam DA majorem.

Vectis CAB, habens pondus G in perpendiculo CD, staticè non differt a vecte DB habente pondera in D & B, ut colligitur ex prop. 6. Ergo vectis CAB nequit manere immotus, ita ut brachium BA congruat cum lineâ horizontali BD, quia pondus G non est minus pondere F, sicut distantia BA est minor distantiâ DA: hinc enim sequitur, centrum gravitatis commune ponderum F & G, non esse in perpendiculo

culo potentia<sup>e</sup> A, sed esse inter A & D, ut patet ex coroll.1. propos.7. Et consequenter pondus G descendit virtute illius partis gravitatis, ob quam, pondus G, ad pondus F, habet rationem reciprocè majorem, quàm habeat distantia BA ad distantiam DA.

*Scholion.*

**B**rachium CA est majus rectâ DA. Itaque si duo brachia BA CA sint aqualia, distantia BA est major distantia DA; vectis autem CAB nequit manere immotus, itaut brachium BA congruat cum lineâ horizontali DB, nisi pondera F & G sint reciproca distantiarum DA, BA. Porro ex proposit.6. vectis DB horizonti parallelus est linea recta solum ad sensum, verè autem est arcus ex centro mundi, ac distantias DA, BA, metiuntur tum ipsi arcus DA, BA, tum anguli quos in centro mundi faciunt perpendiculara, quæ transeunt per puncta A, C, B.

### PROPOSITIO XXX.

**M**otus globi liberè descendentis super plano declivi non est violentus globo, sed est merè naturalis.

Ex eo quòd ascensus globo sit violentus, utpote contrarius gravitati deorsum impellenti, globus qui careat impedimento extrinseco ad ascendendum, non tamen ascendit. Ergo si globo, descensus super plano declivi esset violentus, globus qui careat impedimento extrinseco ad descendendum super plano declivi, non tamen descenderet. Sed hoc est manifestè falsum. Ergo &c. Præterea, ex eo quòd globus sursum projectus ascendat motu violento, habet

bet in principio sui motûs velocitatem summam quam potest habere . Paulatim verò minuitur velocitas ascensûs: ac demum prævalente gravitate , globus desinit ascendere . Ergo si globus descenderet violenter super plano declivi , haberet summam velocitatem in principio descensûs , quæ minueretur paulatim , ac licet non deessent partes spatii declivis super quibus fieret descensus , globus desineret descendere . Sed hæc sunt manifestè falsa . Ergo &c.

*Corollarium .*

**I**Taque motus globi liberè descendentis perpendiculariter , & motus globi liberè descendentis super plano declivi , sunt similes , quia uterque est descensus naturalis .

*Scholion .*


**I**N hypothesi quòd globus descendat super plano declivi , habet impossibilitatem proximam descensûs perpendicularis , adeoque hunc exigit solùm remotè . Concedimus tamen, carentiam descensûs perpendicularis posse dici violentam globo , quia procedit a plano declivi quod est globo extrinsecum, eique globus resistit , premendo ipsum planum gravitate quæ non influat in descensum . Itaque benignâ interpretatione indigent hæc verba Marchetti in rationibus X. Conclus. pag. 30. *Licet , globo descendente super plano declivi , centrum globi moveatur secundum directionem diametri parallele ad planum declive; id tamen non facit globus quia habeat talem exigentiam & inclinationem , sed facit ut sic dicam violenter &c.*

PROPOSITIO XXXI.

**S**I moles æquales  $G$  &  $F$  sint suspensæ ex vertex  $CAB$  qui habeat brachium  $CA$  elevatum, & sit mobilis circa centrum  $A$ ; distantia verò  $DA$  molis  $G$ , sit major distantia  $BA$  molis  $F$ ; motus sursum molis  $F$  per arcum  $BH$  est violentus; motus deorsum molis  $G$  per arcum  $CE$  est naturalis.

Moles  $F$  ascendit per arcum  $BH$  quia impellitur sursum a motore extrinseco, nimirum a mole  $G$  descendente; ac resistit omni ascensui quantum potest. Moles  $G$  ex prop. 29. movetur deorsum per arcum  $CE$  solâ virtute illius partis gravitatis, ob quam moles  $G$  ad molem  $F$  sibi æqualem, habet rationem reciprocè majorem, quàm habeat distantia  $BA$  minor ad distantiam  $DA$  majorem; non verò impellitur deorsum a motore ullo extrinseco, nec repugnat descensui per arcum  $CE$ . Immò ille descensus per  $CE$  est unicè possibilis ac necessarius moli  $G$ . Ergo ascensus molis  $F$  est violentus, descensus molis  $G$  est naturalis. Porro dum incipit motus, moles  $G$  &  $F$  habent a puncto  $A$  distantias  $DA$ ,  $BA$ . Descendente verò mole  $G$  & ascendente mole  $F$ , crescit distantia  $DA$ , minuitur distantia  $BA$ : distantiam autem  $CA$  non habet moles  $G$ , nisi quando brachium  $CA$  congruit cum lineâ horizontali  $DA$ . Itaque delere oportet assumptum & sequelam  $A$ . Marchetti in ration. X. Conclus. pag. 29. *Arcus  $CE$  est linea solius descensus actualis ponderis  $G$ ; ac perpendiculum  $CD$  est linea exigentia seu momenti. Si autem arcus  $CE$  esset linea momenti, momenta ponderum æqualium essent ut rectæ  $CA$ ,  $BA$ .*

PRO-



**S**I globus B liberè descendat super plano declivi SV, non exercet ullum conatum ut se dividat a plano SV.

Ex hypothefi quòd globus liberè descendat super plano SV, planum ipsum nullo modo impedit descensum globi. Sed si globus exerceret aliquem conatum ut se dividat a plano SV, talis conatus necessariò supponeret quòd planum impediret descensum (nam conatus est correlativus impedimenti.) Ergo si globus B liberè descendat super plano declivi SV, non exercet conatum ullum ut se dividat a plano SV. Evidens autem est, globum D qui liberè descendat perpendiculariter, tangendo planum ST, non exercere conatum ullum ut se dividat a plano ST. Quæ dicuntur de globis tangentibus plana ST, SV in suis descensibus liberis, valent de globis, qui sint inserti lineis rigidis, habentibus situm verticalem & declivem, ac liberè descendant.

*Scholion.*

**S**I superficies plani declivis & globi sint præditæ summo lævore, globus in descensu super plano declivi, non rotatur ullo modo circa suum centrum vel axem, ut constat indubitatis experimentis. Oppositum contingit, ubi superficies plani declivis & globi, vel alterutrum careat summo lævore. Nam offendiculum in contactu, retardans descensum globi, & gravitas influens in descensum, causant duos impetus contrarios, qui faciunt ut globus in



*Quibus gravia tendunt deorsum.* 77  
in descensu roteretur circa suum axem vel centrum.

Ex his corruiť assertio P. Pauli Casati in



*Mechan. Lib. 1. cap. 8. quod perpendiculari FI ex puncto contactus F dividat globum in partes inaequaliter graves NI, GI: ac praeponderante parte globi in qua est ejus centrum gravitatis, globus in gyrum conver-*

*sus circa suum centrum, descendat ac roteretur. Nam ubi superficies globi & plani DC habeant summum laevorem, quem nos exigimus in 1. suppositione, globus non rotatur; ac non fit mutatio ulla in diametro contactus, neque in diametro, per quam centrum descendit.*

#### PROPOSITIO XXXIII.


**S**I globi D & B liberę descendant, unus perpendiculariter tangendo planum ST, alter super plano declivi SV; plana ST, SV, in successivis contactibus O & E non sunt fulcra, ex quibus pendeant globi D & B in suis descensibus; ac momenta globorum liberę descendantium non sunt conatus dividendi se ab illis contactibus.

Si globi D & B penderent ex fulcris O & E in suis descensibus, plana ST, SV, sustinerent in suis contactibus pressiones majores totali gravitate globorum D & B, ex prop. 4; & planum ST majorem pressionem sustineret quam planum SV ex prop. 5. nam distantia DO est major quám distantia FE. Sed hæc sunt evidenter falsa, & pugnant cum ipsa hypothese globorum D & B liberę descendantium. Ergo globi D & B non pendent ex contactibus O & E tanquam

ex fulcris . Jam , quia momentum globi D est majus momento globi B, si momenta essent conatus , majorem conatum faceret globus D quàm globus B; & planum ST , majus impedimentum afferret globo D , quàm planum SV afferat globo B . Sed globi non faciunt ullos conatus , & plana non afferunt globis ullum impedimentum ex prop. 32. Ergo momenta non sunt conatus dividendi se a contactibus .

Idipsum demonstratur in hypothesi nostrâ globorum insertorum lineis rigidis verticalibus aut declivibus , & liberè descendantium . Quum enim globi utrovis modo descendant , habeant eadem momenta; si autem sint inserti lineis rigidis, non pendeant ex contactibus: evidens est , momenta non esse conatus dividendi se a contactibus .

*Corollarium .*



**I**taque Marchettus in ration. X. Conclus. pag. 30. 57. 61. & alibi , non benè asserit , globum B pendere ex distantia FE . Similiter pag. 13. & 15. perperam docet , momentum globi su-

per plano declivi esse conatum separandi se a contactu plani declivis .

PROPOSITIO XXXIV.

**S**i globus D liberè descendant perpendiculariter tangendo planum ST, & globus æqualis B liberè descendant super plano declivi SV ; momenta illorum descensuum non habent rationem compositam ex gravitatibus globorum D & B, & ex distantiiis radiorum DL, BC,

nor-

normalium horizonti, a contactibus  $O$  &  $E$ , aut ex ullis aliis distantis.

Momentum globi  $D$  est omnino idem, seu globus tangat planum  $ST$ , seu non tangat illud planum, aut aliud quodcunque. Nam supponimus nihil dari, quod acceleret vel retardet descensum globi  $D$ . Sed momentum globi  $D$  nihil aliud tangentis, non componitur ex gravitate & ex ullâ distantia ut est evidens. Ergo momentum globi  $D$  tangentis planum  $ST$ , non componitur ex gravitate totali & ex distantia  $DO$ , aut ex ullâ aliâ distantia. Jam, quia momentum globi  $B$  est minus momento globi  $D$ , nequit momentum globi  $B$  esse compositum, quum momentum globi  $D$  non sit compositum. Præterea globi  $D$  &  $B$  liberè descendunt ex hypothesi. Sed si haberent momenta composita ex suis gravitatibus & ex distantis quibuslibet, non descenderent liberè per coroll. propof. 5. Ergo globi  $D$  &  $B$  non habent momenta composita. Deinum idipsum evidenter constat in hypothesi globorum  $D$  &  $B$ , qui sint inserti lineis rigidis  $ST$ ,  $SV$ , & liberè descendant.

*Corollarium.*

**I**Taque ire nobis non licet in sententiam, quam docet Alexander Marchettus in scholio propof. 1. Fundamentorum universæ scientiæ de motu uniformiter accelerato, his ferè verbis: *Momentum globi  $B$  componitur ex totali gravitate existente in radio  $BC$  & ex distantia  $FE$ ; momentum globi  $D$  componitur ex totali gravitate existente in radio  $DL$  & ex distantia  $DO$  aquali radio  $BE$ . Quum enim puncta  $O$  &  $E$  sint veluti fulcra ponderum  $D$  &  $B$ ; distet autem centrum*

trum gravitatis globi  $D$  a fulcro  $O$  per rectam  $DO$ , centrum verò gravitatis globi  $B$  distet a fulcro  $E$  per  $FE$ ; palam est, gravia  $D$  &  $B$  aequalia, suspendi ex inæqualibus longitudinibus  $DO$ ,  $FE$ . Iccirco ut  $DO$  ad  $FE$ , ita momentum globi  $D$  suspensi ex  $O$ , ad momentum globi  $B$  suspensi ex  $E$ : quæ non videntur posse revocari in dubium, nisi a mechanicarum rerum prorsus ignavis. Idem assumptum, diu ante Marchettum, eodem medio demonstrandum susceperat Joannes Marcus Marci, libro de proportionibus motûs propos. 14. ac fortasse uterque autor considerat rectas  $DO$ ,  $FE$ , tanquam vectes, quorum fulcra sint in  $O$  &  $E$ , ac pondera sint in perpendiculis  $DL$ ,  $BC$ . Verum, quum globi  $D$  &  $B$  liberè descendant ex hypothesi; adeoque rectæ  $DO$ ,  $BE$ , non sustineantur in  $O$  &  $E$ , nec sustineant pondera, quæ gratis dicuntur illis applicata; quomodo rectæ  $DO$ ,  $FE$  possunt esse vectes?

## PROPOSITIO XXXV.

**M**omentum globi  $B$  descendantis super plano declivi  $SV$  non est æquale gravitati, quâ premitur potentia  $C$ , sustinens globum in radio  $CB$  normali ad horizontem.

Ex coroll. 2. prop. 14. potentia  $C$  premitur totâ gravitate globi  $B$ , ac planum  $SV$  merè tangit ipsum in  $E$ , nec premitur gravitate ullâ. Ergo momentum totale globi  $B$  perpendiculariter descendantis, æquatur gravitati quâ premitur potentia  $C$ . Sed momentum globi  $B$  descendantis super plano  $SV$  non est totale, ex defin. 4. Ergo momentum globi  $B$  &c.

**I** Taque mensura quâ Marchettus in Rationi X. Conclus. pag. 13. explorat momentum globi B descendens super plano SV, applicando potentiam radio CB, est dolosa; eique adversatur Galileus, cujus verba recitavimus in scholio prop. 26.

**PROPOSITIO XXXVI.**

**S**I globus liberè descendat super plano declivi, diameter globi parallela plano est linea directionis respectu illius descensus.

Talis descensus est naturalis ex prop. 30. Et gravitas quæ causat descensum, impellit centrum globi per lineam per quam actu descendit, ut est indubitatum. Videlicet impellit centrum per diametrum globi parallelam plano declivi. Ergo ex defin. 5. illa diameter est linea directionis.

**PROPOSITIO XXXVII.**

**S**I globus liberè descendat super plano declivi, talem descensum causat sola & determinata pars gravitatis, quæ existit staticè in diametro globi parallelâ ad planum declive.

Descensus perpendicularis globi est velocior descensu ejusdem globi super plano declivi, ex 3. suppos. Sed descensum perpendicularem causat tota & sola gravitas ex prop. 3. Ergo descensum super plano declivi non causat tota gravitas, sed sola & determinata pars gravitatis; eademque pars impellit centrum globi per diametrum parallelam ipsi plano ex prop. 36. Ergo pars illa gravitatis exercet suam gravitationem & existit staticè in eadem diametro.

F

Hinc

82 *Investigatio Momentorum*

Hinc rursus demonstratur, momentum descensus esse solius gravitatis, ac non esse compositum ex gravitate ac distantia. Nam gravitas quæ causat descensum, non habet ullam distantiam a lineâ directionis, per quam gravitas impellit centrum globi; ac nequit assignari ulla alia distantia, quæ simul cum gravitate, componat momentum globi descendens super plano declivi. Ergo &c.

## PROPOSITIO XXXVIII.

**S**I globus liberè descendat super plano declivi, pressio quam sustinet planum in successivis contactibus, non est momentum compositum ex gravitate ac distantia ejus a contactu, sed est momentum solius gravitatis; eamque pressionem causat globus, non totâ gravitate, sed parte duntaxat.

Ex prop. 33. globus liberè descendens, nullo modo pendet ex contactu plani declivis. Atqui ex coroll. prop. 5. globus pendêret ex contactu plani declivis si pressio quam sustinet planum in successivis contactibus esset momentum compositum. Ergo non est momentum compositum; adeoque est momentum solius gravitatis. Jam ex 3. supposit. pressio quam sustinet planum horizontale a globo quiescente, est major pressione, quam sustinet planum declive a globo æquali descendente. Sed illam ex coroll. prop. 3. causat globus totâ & solâ gravitate. Ergo istam causat globus, non totâ gravitate, sed parte duntaxat. Adeoque si globus &c.

## PROPOSITIO XXXIX.

**S**I globus liberè descendat super plano declivi, pressio quam a globo descendente sustinet

sustinet planum, causatur a parte gravitatis, quæ existit staticè in diametro contactûs, normali ad planum declive.

Ex propos. 38. pressio quam a globo descendente sustinet planum declive non est momentum compositum ex gravitate ac distantia, sed est momentum solius gravitatis. Ergo hæc pressio est similis pressionibus, quas a globo quiescente sustinent singula duo plana declivia propositionis 18. Atqui pressiones illæ sunt momenta solius gravitatis ex eâdem propos. 18. quia causantur a partibus globi quæ existunt in radiis contactuum, normalibus ad plana. Ergo hæc pressio est momentum solius gravitatis, quia causatur a parte gravitatis quæ existit staticè in diametro contactûs normali ad ipsum planum.

*Corollarium.*

**S**I planum declive esset mera superficies rigida, & haberet virtutem sustentativam, minorem pressione quam exercet globus descendens, non posset manere immotum. Itaque planum declive manet immotum ut supponimus, quia habet virtutem sustentativam, saltem æqualem pressionem exercitam a globo, & exercet virtutem æqualem pressionem exercitam a globo.

PROPOSITIO XL.

**S**I globus liberè descendat super plano declivi, nulla gravitas existit staticè in diametro globi normali ad horizontem.

Globus eatenus habet staticè gravitatem in aliquâ lineâ, quia exercet gravitationem in illâ lineâ, per Axioma 1. Sed globus descendens

super plano declivi non exercet ullam gravitationem in diametro normali ad horizontem. . Nam ista gravitatio nequit exerceri nisi descendendo perpendiculariter, aut premendo potentiam, quæ sit applicata illi diametro, & impediat descensum perpendicularem. Ergo globus descendens super plano declivi non habet staticè ullam gravitatem in diametro normali ad horizontem.

## PROPOSITIO XLI.

**S**I globus descendat super plano declivi, tota ejus gravitas est divisa solum in duas partes. Una existit staticè in diametro parallelâ ad planum, & causat talem descensum. Altera pars existit in diametro normali ad planum declive, ac premit in descensu ipsum planum.

Descensum globi super plano declivi causat sola pars gravitatis, quæ exercet suam gravitationem, & existit staticè in diametro parallelâ ad planum, ex prop. 37. Pressionem verò quam sustinet planum in descensu globi, causat sola pars gravitatis, quæ exercet suam gravitationem, & existit staticè in diametro normali ad idem planum, ex propof. 39. Præter has duas gravitationes, quæ fiunt in prædictis diametris, non fit ulla gravitatio in ullâ aliâ diametro aut lineâ: non enim fit in diametro normali ad horizontem, ex prop. 40; neque in ullâ aliâ diametro, ut est manifestum. Ergo tota gravitas globi est divisa &c.

. *Corollarium.*

**I**N duabus diametris existunt duæ partes globi, quæ simul sumptæ sunt tota & sola gravitas



*Quibus gravia tendunt deorsum.* 85  
vitas globi. Ergo pars existens in unâ diametro, est residua & reciproca partis existentis in aliâ diametro.

PROPOSITIO XLII.

**S**eu globus liberè descendat super plano declivi, seu descensus impediatur per potentiam applicatam lineæ directionis, non mutantur partes gravitatis, quarum una existit staticè in diametro globi parallelâ ad planum declive, altera existit in diametro normali ad ipsum planum.

Si globus descendat super plano declivi, tota ejus gravitas est divisa solum in duas partes. Una existit in diametro parallelâ ad planum declive, ac non premit planum sed causat descensum; altera existit in diametro normali ad planum, ac premit in descensu ipsum planum: una verò pars est reciproca alterius ex prop. 41. ejusque corollario. Si descensus globi impediatur per potentiam applicatam diametro parallelæ ad planum declive, quæ ex prop. 36. est linea directionis, tota gravitas est divisa solum in duas partes. Una existit in diametro parallelâ ad planum declive, ac non premit planum sed potentiam; altera existit in diametro normali ad planum, & premit ipsum planum; atque una pars est reciproca alterius ex coroll. propos. 21. Ergo seu globus liberè descendat &c.

*Corollarium.*

**I**Taque in diametro globi parallelâ ad planum declive existit eadem gravitas partialis, vel globus descendat super plano declivi, vel descensus impediatur per potentiam applicatam,

illi diametro : quia eadem gravitas partialis , exercet suum impetum ac virtutem , vel causando talem descensum , vel premendo potentiam taliter applicatam . Quemadmodum ex coroll. prop. 3. in diametro globi normali ad horizontem, existit eadem gravitas totalis, vel globus descendat perpendiculariter , vel descensus impediatur per potentiam applicatam illi diametro; quia eadem gravitas totalis, exercet suum impetum ac virtutem , vel causando talem descensum , vel premendo potentiam taliter applicatam . Adeoque hypothesis cl. Galilei & aliorum , de quâ diximus in scholio propof. 26. est absolutè vera , quoties potentia applicetur immediatè ipsi globo ; & meritò in Proœmio professi sumus , nostram sententiam penitus congruere cum principiis ejusdem Galilei .

## Scholion .

**I**ordanus in suo Fundam. pag. 97. & Marchettus in Ration. X. Conclus. pag. 13. asserunt , *diametros globorum parallelas planis declivibus esse lineas motuum non verò propensionum; ac solam diametrum normalem horizonti esse lineam propensionis , per quam globus exercet momenta in planis declivibus .*

Quia tamen globus descendens super plano declivi , partem suæ virtutis exercet per diametrum parallelam plano declivi , partem per diametrum normalem ipsi plano , nullam verò exercere potest per diametrum normalem horizonti ex prop. 40; patet , hanc diametrum non esse lineam propensionis, sed alias duas .

**M**omentum globi descendentis perpendiculariter, ad momentum globi æqualis descendentis super plano declivi, est ut gravitas totalis quæ existit in diametro globi normali ad horizonem, & exercet suum impetum, vel causando descensum perpendicularem, vel premendo potentiam applicatam illi diametro & impediens illum descensum; ad gravitatem partialem quæ existit in diametro globi parallelâ ad planum declive, & exercet suum impetum, vel causando descensum super plano declivi, vel premendo potentiam applicatam illi diametro, & impediens illum descensum.

Ex defin. 4. momentum totale globi descendentis, est impetus quo globus liberè descendit perpendiculariter. Momentum ejusdem globi descendentis super plano declivi, est impetus quo globus incumbens plano declivi, liberè descendit super plano declivi. Sed isti impetus oriuntur ex gravitate totali aut partiali, quæ causat descensus vel pressiones ex coroll. prop. 42. Ergo momentum &c.

*Corollarium.*

**I**taque jungendo hypothesim propositionis 23. cum hypothesi hujus propositionis, momentum globi 6. libr. descendentis super plano DM est bilibre, & æquatur gravitati bilibri, quæ existit in radio AG, & exercet suam virtutem vel premendo potentiam G, vel causando descensum super DM ex prop. 42. Momentum globi 6. libr. descendentis super plano EM est quadrilibre, & æquatur gravitati quadrilibri, quæ existit in radio AF, & exercet suam

virtutem aut premendo potentiam F, aut cau-



sando descensum super EM. Momentum 6. libr. globi descendens perpendiculariter, æquatur ipsi gravitati 6. libr. quæ existit in radio AP normali ad horizontem, & exercet suam

virtutem, vel premendo potentiam P, vel causando descensum perpendicularem ex coroll. prop. 3.

#### PROPOSITIO XLIV.

**S**I in triangulis rectangulis æqualibus DNM, EOM, invicem sejunctis, hypotenusæ DM, EM sint plana inæqualiter declivia, bases verò NM, OM sint parallelæ horizonti, & globi æquales liberè descendant super planis DM, EM: momenta globorum descendantium, ad momentum totale singulorum, sunt ut sui anguli elevationis DMN, EMO, ad rectum.

Juxta hypothesim propositionum 23. & 43. & corollariorum utriusque, si duo globi sint 6. libr. momentum unius descendens super plano DM est bilibre; momentum alterius descendens super plano EM est quadrilibre; momentum verò totale singulorum est 6. libr. Sed momentum bilibre ad momentum 6. libr. est ut angulus elev. DMN 30. grad. ad angulum rectum, qui est 90. grad. momentum quadrilibre ad momentum 6. libr. est ut angulus elev. EMO 60. grad. ad rectum. Ergo momenta &c.

Præterea ex prop. 43. momentum globi A descendens super plano EM, ad momentum ejusdem globi descendens perpendiculariter, est

est ut pars globi quæ premit potentiam  $F$ , impediens descensum globi  $A$ , per applicationem ad lineam directionis  $FA$ , ad totum globum, qui premit potentiam  $P$ , impediens descensum perpendicularem, per applicationem ad lineam directionis  $PA$ . Sed pars globi ad totum globum est ut angulus elevat.  $\text{EMO}$  ad rectum. Ergo momentum parziale ad totale est ut angulus elev. ad rectum.

*Corollarium.*

**I**Taque videmur attigisse scopum quem nobis præfiximus in hac Investigatione. Scilicet ut ex fundamentis æqualis evidentix cum propositione 6. Libri I. *Æquipond. Archimedis*, momenta descensuum indagaremus per momenta pressionum.

**PROPOSITIO XLV.**

**I**uxta hypothesim propositionis 44. momenta duorum globorum simul sumpta, sunt æqualia momento totali singulorum; partes verò globorum, quæ in descensibus premunt plana  $DM, EM$ , simul sumptæ, sunt æquales totali gravitati singulorum, sicut duo anguli tum elev. tum inclin. simul sumpti sunt æquales angulo recto.

Momentum bilibre globi 6. libr. descendens super plano  $DM$ , unâ cum momento quadrilibræ globi 6. libr. descendens super plano  $EM$ , conflatur momentum 6. libr. sicut angulus elev.  $DMN$  30. gr. unâ cum angulo elev.  $\text{EMO}$  60. gr. conflatur angulum rectum. Pars quadrilibræ unâ cum parte bilibræ, conflatur gravitatem totalem 6. libr. ut angulus inclin.  $MDN$  60. gr. unâ cum angulo incl.  $MEO$  30. gr. conflatur angulo.

angulum rectum. Ergo tota propositio est manifesta.

### PROPOSITIO XLVI.

**I**uxta hypothesim propositionis 44. momenta singulorum globorum descendantium, sunt reciproca gravitatum partialium, quæ in descensibus premunt plana declivia.

Si momentum sit bilibre, gravitas quæ premit planum est quadrilbris. Si illud sit quadrilibre, hæc est bilibris. Ergo &c. Præterea momentum globi descendens, ex coroll. 2. prop. 23. & ex prop. 44. est ut angulus elevat. gravitas verò premens in descensu planum declive, est ex prop. 45. ut angulus inclin. Sed angulus elev. ex lemmate 3. est reciprocus anguli inclin. Ergo momentum globi descendens est reciprocum gravitatis prementis planum. Adeoque momentum globi descendens, & gravitas premens planum in descensu, sunt medietates totius gravitatis, si angulus elev. & inclin. sit semirectus.

### Corollarium.

**I**Taque momentum unius globi descendens, æquatur gravitati, quæ alius globus æqualis premit in descensu suum planum.

### PROPOSITIO XLVII.


**I**uxta hypothesim propof. 44. momenta globorum æqualium descendantium super planis DM, EM, ad momentum totale singulorum, non sunt ut perpendiculara DM, EO, ad planum DM.

Ex coroll. 1. lemmatis 3. latera EO, MN, sunt invicem æqualia; & ex coroll. 1. lemmatis 6. latera DM, MN, in directum posita, sunt majora

*Quibus graviora tendunt deorsum: 91*

majora hypotenusâ  $DM$ . Ergo si momenta duorum globorum æqualium, ad momentum totale singulorum, sint ut perpendiculara  $DN$ ,  $EO$ , ad planum  $DM$ , nimirum sint ut latera  $DN$ ,  $MN$ , ad hypotenusam  $DM$ ; momenta simul sumpta sunt majora momento totali. Atqui non sunt majora, sed sunt æqualia momento totali, ex prop. 45. Ergo non sunt ut perpendiculara  $DN$ ,  $EO$ , ad planum  $DM$ .

*Scholion.*



**I**uxta doctrinam A. Marchetti, de quâ in coroll. prop. 34. momenta globorum  $D$  &  $B$  descendantium, sunt ut rectæ  $ST$ ,  $SV$ , quia sunt ut rectæ  $EF$ ,  $DO$ . Sunt autem ut  $EF$ ,  $DO$ , quia

sunt composita ex gravitatibus & ex distantiiis. Atqui ex prop. 34. momenta non sunt composita. Ergo non sunt ut  $EF$ ,  $DO$ ; neque ut  $ST$ ,  $SV$ .



Juxta doctrinam Francisci Spoleti, qui Romæ ac Venetiis edidit opusculum *De momento gravis in plano inclinato*, si globus descendat super plano declivi  $DC$ , diameter globi  $NG$  parallela hori-

zonti est vectis primi generis; fulcrum est perpendicularum  $FI$  ex contactu  $F$ , pondera sunt segmenta gravia  $NI$ ,  $GI$ . Causa descensus est excessus, quo momentum segmenti  $GI$  superat momentum segmenti  $NI$ , ac talis excessus est momentum globi super plano  $DC$ . Stantibus his, longo ac subtili progressu, ex doctrinâ si-

num

num ostendit Autor, momentum globi descendentis super plano DC ad momentum totale, esse ut rectam DA ad DC. Verum, si cogitemus, globum insertum lineæ rigidæ DC liberè descendere, non datur contactus F, adeoque nec segmenta NI, GI. Ergo descensus non causatur ab excessu, quo momentum segmenti GI superat momentum segmenti NI. Præterea, docet Autor, momentum descensus, unâ cum momento gravitationis, quâ in ipso descensu premitur planum declivæ, æquari momento totali. Et ex propof. 41. momentum descensus exercetur in diametro globi parallêlâ ad planum declivæ, momentum gravitationis exercetur in diametro normali ad ipsum planum. Ergo descensus causatur a gravitate, quæ existit in diametro parallêlâ ad planum declivæ; non verò ab excessu, quo momentum segmenti GI superat momentum segmenti NI.

Juxta doctrinam V. Jordani, prop. 7. sui Fundamenti, si rectæ  $FD$ ,  $FG$  sint æquales, ac triangula rectangula  $FED$ ,  $ACB$ , sint similia, momentum globi  $D$  liberè descendentis super plano  $AB$ , ad totale, est ut recta  $FE$  ad  $FG$ ,



ut FE ad FD, ut AC ad AB. Nam Autor concipit rectam FG uti vectem secundi generis, habentem pondus in E, fulcrum in F, potentiam in G. Adeoque Jordanus investigat momentum globi D per pondus, quod in illâ hypothefi fuffinet potentia G. Atqui fi diametri globorum æqualium congruerent cum lineis rigidis



gidis AC, AB, & globi essent liberi ad suos descensus, potentia impediens descensum perpendiculararem applicanda esset lineæ directionis AC, ut sustineret pondus æquale momento globi. Ergo potentia impediens descensum globi per lineam AB, applicanda est ipsi lineæ directionis AB, ut sustineat pondus æquale momento globi. Et quidem Galileus, cujus doctrinam de momentis promovere satagit Jordanus, ita faceret, ut ostensum est in scholio propof. 26. Si autem potentiz applicentur lineis directionis AC, AB; momentum globi D ut descendat super plano AB, ad totale, est ut angulus B ad C, ex cor. prop. 25. & non datum vectis FG. Præterea mensuræ distantiarum, FE, FG non sunt lineæ rectæ, ut malè supponit Jordanus, sed sunt anguli, quos tria perpendiculara faciunt in centro mundi, & arcus ex eodem centro, per scholion prop. 7. ac proportio inter arcus FG, FE, non est eadem cum proportione inter rectas AB, AC. Ergo per vectem FG nequit indagari descensus globi D super plano AB.

PROPOSITIO XLVIII.



**S**I globus sustineatur a duobus planis normalibus DM, EM, momenta quibus globus descenderet super planis DM, EM, simul sumpta per intellectum, sunt æqualia momento totali. Adeoque sunt ut anguli elev. DMN, EMO; ac non sunt ut perpendiculara DN, EO.

Patet

Patet ex propof. 44. 45. & 47. adeoque ex duobus momentis femel componitur momentum globi totale per additionem imaginariam.

*Scholion.*



**P** A. Adamandus in Consideratione Speciminis libri de momentis gravium, edita Lipsiæ inter Acta Eruditorum anni 1685. supponit in triangulis rectangulis æqualibus DNM, MOE, latera esse rationalia, nimirum hypotenusas DM, EM, 5. latera EO, MN, 4. latera DN, MO, 3. finum versum CO, 2. finum versum BN, 1. Jam si gravitas totalis, ac momentum totale globi A sit libr. 5. idem Autor docet, momentum totale ad momenta partialia globi descendentis super planis DM, EM, esse ut finum totum DM ad sinus rectos DN, EO; ac momentum totale globi æquari aggregato ex momentis descensuum & ex momentis pressionum, ita verò arguit. Momentum totale globi ad momentum descensuum super plano DM, sit ut DM 5. ad DN 3. Ergo pars globi quæ premit planum DM ad totale momentum, est ut 2. ad 5. Momentum idem totale globi ad momentum descensuum super EM, sit ut EM 5. ad EO 4. Ergo pars globi quæ premit planum EM, ad momentum totale, est ut 1. ad 5. Colligendo itaque in unum momenta descensuum & momenta pressionum; momentum totale ad momenta partialia descensuum super planis DM, EM, est ut bis 5, ad 3. plus 4. seu est ut 10. ad 7. & idem totale

totale momentum , ad momenta partialia pressionum , seu ad partes quæ premunt plana DM, EM , est ut bis 5. ad 2. plus 1. seu est ut 10. ad 3. Porro in confirmationem hujus argumenti assumit Autor , a sinibus rectis ac versis non exprimi quantitates absolutas , sed solam proportionem inter momenta , & inter partes quæ premunt plana declivia . Itaque in hac sententiâ comparatio inter momenta & inter partes quæ premunt plana declivia , facit ut momentum ac pondus totale 5. libr. evadat 10. libr. quod est impossibile .

Præterea libræ quæ non premunt planum EM, sed sunt momentum globi descendens super EM sunt 4. Libræ quæ non premunt planum DM , sed sunt momentum globi descendens super DM sunt 3. Libræ quæ premunt planum DM sunt 2. Libra quæ premit planum EM est 1. Atqui 4. non sunt 2. Ac 3. non sunt 1. Ergo momentum descensûs super plano EM , seu gravitas quæ non premit planum EM , non est gravitas quæ premit planum DM : momentum descensûs super plano DM, seu gravitas quæ non premit planum DM , non est gravitas quæ premit planum EM . Sed ista consequentia est evidenter falsa . Nam pars globi quæ non premit unum ex planis , premit aliud . Falsum est etiam assumptum Autoris , videlicet a sinibus rectis ac versis non exprimi quantitates absolutas , sed solam proportionem momentorum ac partium quæ premunt plana declivia , ut ostendimus coroll. prop. 16. Ergo totum argumentum Autoris est falsum .

## PROPOSITIO XLIX.

**S**I plana declivia faciant angulum acutum, momenta quibus globi æquales descenderent super illis planis sejunctis, simul sumpta per intellectum, sunt majora momento totali.

Momentum globi descendensis super plano declivi ad momentum totale, est ut angulus elev. ad rectum ex prop. 45. Momenta verò globorum æqualium, descendantium super planis declivibus, sunt ut anguli elev. suorum planorum declivium, ex prop. 48. Sed si plana declivia faciant angulum acutum, duo anguli elev. quos plana faciunt cum horizonte, simul sumpti sunt majores angulo recto, ex coroll. 2. lemmatis 3. Ergo momenta quibus globi æquales descenderent super illis planis sejunctis, simul sumpta per intellectum sunt majora momento totali.

## PROPOSITIO L.

**S**I plana declivia faciant angulum obtusum, momenta globorum æqualium, descendantium super illis planis sejunctis, simul sumpta per intellectum, sunt minora momento totali.

Patet ex prop. 49.

*Corollarium.*

**I**Taque si plana declivia faciant cum horizonte angulos æquales, angulus autem quem faciunt duo illa plana sit acutus; momenta duorum descensuum sunt æqualia, & simul sumpta per intellectum, sunt majora momento totali. Si angulus quem faciunt duo plana sit obtusus, momenta sunt minora momento totali. Et consequen-

sequenter , ad investiganda momenta descensum per momenta pressio-  
num reciprocè sumpta , quæ sustinentur a duobus planis decli-  
vibus, frustra adhibentur plana quæ non sint nor-  
malia .

PROPOSITIO LI.

**M**omentum descensus cujuscunque glo-  
bi , est realiter distinctum a gravitate  
ipsius globi .

Idem globus , habens eandem gravitatem ,  
potest exercere , vel momentum totale descen-  
dendo perpendiculariter , vel momentum par-  
tiale descendendo super plano declivi ; vel po-  
test non exercere momentum ullius descensus ,  
si videlicet globus detineatur omninò immo-  
tus . Ergo &c. Et consequenter , non solum  
momentum compositum ex gravitate ac distan-  
tiâ , sed etiam momentum solius gravitatis , di-  
stinguitur a gravitate . Nihilominus , momen-  
tum cujuslibet descensus , est æquale gravitati  
quæ causat descensum , ut probatum est .

*Scholion .*

**I**mpulsus quo globus quiescens premit pla-  
num horizontale , aut globus descendens  
premit planum declive , est momentum pressio-  
nis . Similiter , impulsus illi , quibus globus  
premit duo plana declivia , sunt momenta pres-  
sionum . Quia verò , idem globus , habens ean-  
dem gravitatem , potest exercere unum vel al-  
terum ex momentis pressio-  
num , ac potest care-  
re singulis , immò & omnibus , ut contingit dum  
globus descendit perpendiculariter ; evidens  
est , momenta quoque pressio-  
num distingui a  
gravitate . Unumquodque tamen horum mo-

G

mento-

mentorum, est æquale gravitati ex quâ procedit, ut dictum est.

PROPOSITIO LII.



**S**I una potentia trahat fursum perpendiculariter fila BD, BC, quæ transeant per foramen positum in B, & habeant in D & C pondera æqualia; violentiæ quas in ascensibus DH, CE, patiuntur pondera D & C, sunt ut angulus rectus D ad angulum elev. C; ac violentiæ, quas in ascensibus CE, BF, patiuntur pondus C & summitas sui fili, sunt æquales. Loquimur autem juxta hypothesim propositionis 26. & corollarii ejus 3.

Spatia BF, CE, DH, quæ decurruntur eodem tempore, a potentiâ trahente fila ex B in F, & a ponderibus C & D, ascendentibus in E & H, sunt æqualia ut est manifestum. Ex coroll. autem 2. prop. 26. pars ponderis C quæ premit in ascensu planum CB, ad partem quæ premit potentiam trahentem fila, est ut angulus inclin. ad angulum elev. plani CB: adeoque potentia trahens fila, sustinet pondus totale D, ac partem ponderis C, quæ ad pondus totale D, est ut angulus elev. C ad angulum rectum D. Ergo pondus D resistit ascensui DH totâ suâ gravitate; pondus verò C resistit ascensui CE parte gravitatis, quæ ad totam gravitatem D, est ut angulus elev. C ad rectum D. Sed violentiæ quas patiuntur pondera D & C in ascensibus DH, CE, sunt æquales gravitatibus, quæ resistunt illis ascensibus, ut est indubitatum; pondus autem C æquè resistit ascensui CE,  
ac

*Quibus gravia tendunt deorsum.* 99

ac summitas sui fili resistat ascensui BF juxta  
hypothesim propof. 26. & cor. propof. 13. Er-  
go violentiæ &c.

*Corollarium.*

**I**Taque rectæ æquales CE, DH, BF, sunt  
mensuræ velocitatum æqualium, quas ha-  
bent pondera C & D, & potentia trahens sum-  
mitatem filorum, non autem sunt mensuræ vio-  
lentiæ æqualium, quas in suis ascensibus  
CE, DH, patiantur ipsa pondera C & D.


*Scholion.*

**P** Casatus lib. 1. Mechan. cap. 13. suppo-  
nens triangula rectangula BDC, EAC,  
esse similia, & rectas HD, EC, esse æquales,  
ita arguit. Momenta descensuum sunt ut resi-  
stentiæ ad ascensus, adeoque sunt ut violentiæ  
ipforum ascensuum. Sed violentiam ascensûs  
obliqui CE, metitur ejus perpendicularum AE;  
sicut violentiam ascensûs perpendicularis DH,  
metitur ipsum perpendicularum DH: est autem  
DH ad AE, ut EC ad EA, ut BC ad BD. Er-  
go momentum totale ad mom. super plano BC,  
est ut recta BC ad BD. Eundem ferè discursum  
habet P. Eschinardus to. 1. Cours mathem. Ap-  
pend. 4. Constat autem ex dictis, primam par-  
tem minoris esse falsam, & argumentum ita ef-  
se formandum. Momenta descensuum per li-  
neas BC, FD, sunt ut violentiæ ascensuum per  
lineas CB, DF. Sed hæ sunt ut anguli C & D.  
Ergo & illa.

Ex his patet responsio ad argumentum simi-  
le illi, quod attulimus coroll. 3. propof. 26. &  
utrumque est Galilei addit. posthumâ ad Dial.  
III. Momentum globi A liberè descendente

G 2 super

super plano DM, ad momentum totale ipsius



descendentis perpendiculariter, est ut violentia, quâ globus A promovetur ex M in I, dum globus B trahitur deorsum ex D in N, ad violentiam quâ idem globus A æquali

tempore promoveretur perpendiculariter ex N in D. Sed violentia ascensûs obliqui MI, ad violentiam ascensus perpendicularis, est ut perpendicularum PI ad ND. Ergo momentum ad momentum est ut recta IP ad DN seu ad IM; nimirum est ut sinus rectus DN ad sinum totum DM. Constat autem ex dictis, discursum ita esse formandum: momenta unius ponderis sunt ut violentiæ ascensuum ejusdem ponderis. Hæ sunt ut anguli M & N. Ergo & illa.

#### PROPOSITIO LIII.

**V**elocitas globorum inæqualium similiter descendentium, non sunt ut gravitates. Eandem tamen proportionem habent velocitates duorum globorum inæqualium, qui determinato tempore descendant super planis æqualiter declivibus, & velocitates eorundem globorum, qui tempore illi æquali descendant perpendiculariter.

Sit globus A decuplo gravior globo B, & ambo similiter descendant. Experientia docet, spatium quod globus A decurrit determinato tempore, exempli gratia uno minuto horæ, non esse decuplum spatii, quod uno minuto decurrit globus B; nec spatia decursa esse æqualia, sed unum esse paulo majus alio, ut ostendit

P. J. B.



P. J. B. Ricciolius in *Almagesto*, Lib. IX. sect. IV. cap. 16. Sed spatia quæ decurruntur eodem tempore a duobus mobilibus, sunt ut eorum velocitates extra controversiam. Ergo velocitates globorum inæqualium similiter descendendum, non sunt ut gravitates.

Jam, si in descensibus perpendicularibus, spatia, quæ uno minuto decurruntur a globis A & B sint ut 21. ad 20. & supponamus, globos descendere super planis habentibus elevationem, subtriplam elevationis perpendicularis, spatia quæ decurruntur uno minuto a globis A & B sunt subtripla spatiorum decursum uno minuto ab eisdem globis descendentes perpendiculariter, ut colligitur ex propo. 44. Ergo ex ratione permutatâ, eandem proportionem habent spatia quæ decurruntur determinato tempore a globis descendentes super planis æqualiter declivibus, & spatia quæ decurruntur tempore illi æquali ab eisdem globis descendentes perpendiculariter. Et consequenter, eandem proportionem habent velocitates duorum globorum, qui determinato tempore descendunt super planis æqualiter declivibus, & velocitates eorundem, qui tempore æquali descendant perpendiculariter.


PROPOSITIO LIV.

**S**I in hypothesi quod globus B detineatur immotus per potentiam C applicatam diametro normali ad horizontem, globus verò A incumbens plano declivi DM detineatur immotus per potentiam G applicatam diametro parallelæ ad ipsum planum, æqualia sint pondera quæ premunt ipsas potentias; non propterea

G 3

si abla-

si ablatis potentiis globi descendant, sunt æquales eorum velocitates.



Juxta hypothesim de qua diximus propof. 25. globi B & A æquè premunt potentias C & G, quia pars globi A premens potentiam G est æqualis toti globo B prementi potentiam C. Si autem globi liberè descendant, descensus perpendicularis globi B minoris, est velocior descensu super plano declivi globi A majoris, ut docet experientia. Ergo &c.

*Corollarium.*

**I**Taque velocitates globorum B & A liberè descendantium, etiamsi oriantur ex gravitatibus æqualibus non sunt æquales.


#### PROPOSITIO LV.

**S**I descensus globorum inæqualium B & A oriantur ex gravitatibus æqualibus, non propterea momenta eorundem globorum descendantium sunt æqualia.

Ex definitione 4. momenta sunt impetus quibus globi descendant. Ergo momenta globorum inæqualium B & A descendantium, non sunt æqualia, nisi impetus & velocitates ipsorum descendantium sint æquales. Atqui velocitates non sunt æquales ex coroll. prop. 54. Ergo nec momenta. Eodem modo, momenta globorum T & V propositionis 27. descendantium super planis AB, AF, non sunt æqualia.

*Scho-*

Scholion.



**E**X his respondetur ad argumentum N. Tartaleæ Lib. VIII. Quæst. & Invent. divers. prop. 15. Momenta globorum T & V liberè descendantium sunt æqualia, si quantum globus V est gravior ra-

tione sitûs, globus T sit gravior ratione sui. Sed ita contingit si pondera globorum T & V sint ut longitudines planorum declivium AB, AF. Ergo in hac hypothese, momenta globorum T & V descendantium sunt æqualia. Major corrui ex hac propos. minor verò ex propos. 27.

#### PROPOSITIO LVI.

**M**omenta globorum inæqualium similiter descendantium non sunt ut gravitates.

Si momenta essent ut gravitates, ubi globus A sit decuplo gravior globo B, & ambo descendant perpendiculariter aut super planis æqualiter declivibus, velocitas globi A esset decupla velocitatis globi B ex prop. 55. Sed hoc est falsum ex prop. 53. Ergo momenta non sunt ut gravitates.

Corollarium.

**I**taque velocitates nequeunt considerari nisi in globis æqualibus, vel adhibendo cautionem quam indicavimus prop. 53.

## QUÆSTIONES

*Ad Momenta Gravium spectantes .*

**S**I in fistulâ vitreâ ABC, quæ habeat uniformem ambitum & sit plena aquâ , brachium BC sit normale horizonti, brachium BA sit declive, ac fistulæ orificia immersa intra aliam aquam, insistant lineæ ad horizontem parallelæ . Quæritur  
1. an partes BA, BC aquæ,




quas videmus manere suspensas intra fistulam habentem utrumque orificium apertum, maneant immotæ quia momenta earum sint æqualia ?

Respondeo, partes BA, BC aquæ manere immotas, quacunque sit figura fistulæ, seu quacunque sit proportio inter momenta partium BA, BC aquæ . Præterea, si fiat foramen in summitate fistulæ, quod præbeat ingressum novo aëri, tota aqua statim descendit; foramen autem non mutat momenta partium aquæ . Ergo ratio cur maneat suspensa, non est æqualitas momentorum: ac falsum est, datum iri motum perpetuum nisi momenta partium BA, BC aquæ sint æqualia, & sint ut rectæ BA, BC .

**S**I duobus planis declivibus inæqualibus BA, BC, quæ cum rectâ horizonti parallelâ AC faciant angulos inæquales acutos, incumbat torquis constans globulis, mole, pondere ac distantia invicem æqualibus . Quæritur

ritur 2. an torquis maneat immotus , quia partes ejus BC , BA habeant momenta æqualia ?



Respondeo , torquem manere immotum , etiamsi addatur aliquod pondus uni ex partibus

BA, BC . Ergo non manet immotus , quia momenta partium BC, BA sint æqualia .

Itaque Stevinus Lib.I. Staticæ prop.19. falsò putavit datum iri motum perpetuum , nisi partes BC,BA torquis haberent æqualia momenta .



**S**I in tubo vitreo ABCEA, pleno aquâ vel mercurio aliove liquore perfectè fluidis , latera inæqualia BA , BC faciant angulos acutos cum rectâ imaginariâ CA


parallelâ horizonti . Quæritur 3. an liquor maneat omninò immotus in tubo perfectè clauso , quia partes BA , BC liquoris habeant momenta æqualia ?

Respondeo totum liquorem manere immotum , quæcunque sit figura tubi , ac proportio inter partes BA, BC liquoris . Ergo &c.

Itaque Herigonius t. III. in Mechan. prop. 8. falsò putavit datum iri motum perpetuum in liquore , nisi partes BA , BC habeant momenta æqualia .

**A** Ntequam proponatur ultima quaestio, demonstrare oportet sequens theorema. Si solidum  $V$  levius aquâ in specie, & ejusdem altitudinis cum vase  $ABCD$  detineatur immotum ab aliquâ potentia, itaut basis solidi tangat fundum vasis donec vas impleatur aquâ. Deinde removeatur potentia, ut descendente aquâ elevetur solidum. Elevatio solidi supra fundum vel summitem vasis, ad depressionem aquæ circumfusæ ipsi solidi, est ut basis aquæ ante ejus depressionem, ad basim solidi.

Sit vas  $ABCD$ , cujus latus  $BC$  4. altitudo  $BA$  similiter 4. adeoque basis quadrata  $BK$  sit 16. soliditas  $AK$  sit 64. Intra illud vas sit solidum parallelepipedum  $V$ , cujus latus  $BE$  2. altitudo  $BA$  4. æqualis altitudini vasis; adeoque basis quadrata  $BI$  solidi sit 4. soliditas




$AI$ , 16. Si solidum intra vas insitit basi  $BI$  & habeat aquam circumfusam ad altitudinem  $BA$  ipsius solidi & vasis; basis  $EK$  aquæ 12. ad basim  $BI$  solidi 4. est ut 3. ad 1. Rursus si gravitas specifica solidi sit subdupla gravitatis specificæ aquæ (nimirum si aqua æqualis in mole ipsi solidi, habeat gravitatem absolutam, duplam gravitatis absolutæ ipsiusmet solidi) & aqua finatur descendere & elevare solidum; medietas  $FH$  solidi quæ est 8. extabit supra aquam. Quum autem complexum ex aquâ & ex solido esset 64. detractâ medietate  $FH$ , seu detractis

8. ex

8. ex 64. complexum ex aquâ & ex reliquâ medietate FG solidi demersâ intra aquam, est 56. Dividatur 56. per 16. videlicet per basim quadratam BK vasis, fiunt  $3\frac{1}{2}$  hæc autem est altitudo FB aquæ post ejus depressionem ob solidum elevatum. Itaque elevatio solidi supra fundum vasis est GB  $1\frac{1}{2}$  (cui æqualis est elevatio HA supra summitatem AD vasis) depressio aquæ est AF  $\frac{1}{2}$  & elevatio GB vel HA solidi ad depressionem AF aquæ est ut 3. ad 1. Proinde elevatio GB vel HA solidi, ad depressionem AF aquæ, est ut basim EK aquæ, ad basim BI solidi. Adeoque non elevatio HF solidi supra aquam, sed elevatio GB solidi supra fundum vasis, aut elevatio HA supra summitatem AD vasis, ad depressionem AF ipsius aquæ, est ut basim EK aquæ ad basim BI solidi. Hoc theorema est secunda propositio Galilei de Inatantibus editionis secundæ, sed clariùs demonstrata.

Idipsum alio exemplo sic ostenditur. Sit vas LMNO, cujus latus MN 6. altitudo ML 4. ut in alio vase. Adeoque basim quadratam MX sit 36. soliditas LX 144. Intra vas sit solidum æquale alteri. Si solidum intra vas insistat basi MT, & reliquum vasis sit ple-


num aquâ; basim PX aquæ 32. ad basim MT solidi 4. est ut 8. ad 1. Si autem solidum sinatur elevari ab aquâ, medietas QS solidi quæ est 8.



exabit supra aquam; detractisque 8. ex 144. complexum ex aquâ & ex medietate solidi demersâ intra aquam est 136. Dividatur 136. per 36. fiunt 3  $\frac{7}{9}$  hæc autem est altitudo MQ aquæ post ejus depressionem ob solidum elevatum. Itaque elevatio solidi supra fundum vasis est RM 1  $\frac{7}{9}$  (cui æqualis est elevatio SL supra summitatem LO vasis) depressio aquæ est LQ  $\frac{2}{9}$  Et elevatio RM aut SL solidi, ad depressionem LQ aquæ, est ut 8. ad 1. adeoque est ut basis PX aquæ ad basim MT solidi.

Ex his constat depressionem AF aquæ ad depressionem LQ esse ut 9. ad 4. basim verò EK ad basim PX esse ut 3. ad 8. Ergo depressiones in duplici vase non sunt reciproce basium, & ex 32. XI. non sunt reciproce molium & gravitatum utriusque aquæ.

His positis quærimus 4. an sint veræ assertio-



nes quæ continentur in sequentibus verbis Operis citati de Innatantibus. Dum attollitur solidum M, elevatio solidi (supra fundum aut summitatem vasis) ad depressionem aquæ circumfusæ ENSF, habet eandem proportionem quam basis ipsius aquæ ad basim solidi. Sed basis solidi ad basim aquæ AD, habet eandem proportionem quam depressio aquæ AC ad elevationem solidi M. Ergo ex proportionem perturbata, dum attollitur solidum M, depressio aquæ ABCD ad depressionem aquæ ENSF, habet eandem proportionem quam habet basis aquæ EF ad basim aquæ AD, seu quam habet



habet tota moles aqua ENSF ad totam molem aqua ABCD, quum illa moles sint aequæ altæ. Est igitur manifestum, quomodo in extrusione & elevatione solidi M, aqua ENSF tantumdem superet in velocitate motus aquam ABCD, quantum ab ea superatur in velocitate: iccirco momenta earum in tali operatione sunt æqualia.

Respondeo primum consequens in argumento Autoris esse falsum ex theoremate ipsius & nostro, ac præterea falsam esse consequentiam & minorem, ac non dari locum discursui ex ratione perturbatâ. Quia in hac, sex tantum termini debent reperiri ex 23. V. Element. ut apparet ex hoc diagrammate.

A	B	E	F	C	D
Ut A ad B			ita C ad D.		
Sed	ut B ad E		ita F ad C.		Ergo ex ratione perturbatâ
ut A	ad E		ita F ad D.		

In argumento autem termini sunt septem; videlicet

- |   |                                   |   |                                 |
|---|-----------------------------------|---|---------------------------------|
| 1 | A Basis aquæ minoris.             | 4 | D Descensus aquæ minoris.       |
| 2 | B Basis solidi.                   | 5 | E Basis aquæ majoris.           |
| 3 | C Elevatio solidi in aquâ minori. | 6 | F Descensus aquæ majoris.       |
|   |                                   | 7 | Elevatio solidi in aquâ majori. |

Itaque in minori argumenti elevatio solidi in aquâ majori, confunditur cum elevatione in aquâ minori; quum elevationes illæ distinguendæ sint, utpote diversæ. Pluraque horum ad quæstionem 4. spectantium, decerpsi ex literis Flo-

110 *Investigatio Momentorum*  
Florentiâ scriptis. A 1619. ad P. Christophorum  
Griembergerum a D. Richardo de Burgo Hi-  
berno, & ex responsionibus Griembergeri.

LAUS DE



---

ERRATA.

Pag. 46. *versu* 21. *deleatur* 2  
Pag. 57. *versu* 28. XIX. lege XXI.







